

四庫全書

集部

欽定四庫全書

集部

施註蘇詩卷二十三

詳校官庶吉士臣李傳熊

檢討臣何思鈞覆勘

覆校官中書臣宋 鎔

校對官主事臣龔敬身

謄錄監生臣賀 瑛

欽定四庫全書

施註蘇詩卷二十三

宋蘇軾撰

施元之原註

武進邵長蘅刪補

詩四十八首

起常州居住海赴登州道中作是歲元豐乙丑先生年五十施註缺今補

李憲仲哀詞并引

同年友李君諱惇字憲仲賢而有文不幸早世軾
不及與之遊也而識其子廌有年矣廌自陽翟見
予於南京泣曰吾祖母邊母馬前母張與君之喪
皆未葬貧不敢以饑寒為戚顧四喪未舉死不瞑
目矣適會故人梁先吉老聞余當歸耕陽羨以絹
十匹絲百兩為贐辭之不可乃以遺廌曰此亦仁
人之餽也既又作詩以告知君與廌者庶幾皆有
以助之薦年二十五其文晔然氣節不凡此豈終

窮者哉

大夢行當覺百年特未滿遑哀已逝人長眠寄孤館念
我同年生意長日月短鹽車困騏驎烈火廢圭瓚後生
有奇骨出語已精悍蕭然野鶴姿誰復識中散有生寓
大塊死者誰不窳嗟君獨久客不識黃土煖推衣助孝
子一溉滋湯旱誰能脫左縣大事不可緩

莊子齊物論覺而後知其夢也且有覺而後知大夢
也野鶴用愁結事見十二卷京師哭任遵聖詩注莊子
大宗師大塊載我以形勞我以生佚我以老息我以死
西漢楊王孫報祈侯書曰乃得歸土就其真宅由是言

之焉用久客詳見十六卷遊桓山會者十人詩注嵇康
養生論為稼于湯世偏有一溉之功者雖終焦爛必一
溉者後枯然則一溉之益固不可誣禮記檀弓孔子之
衛遇舊館人之喪入而哭之哀出使子貢脫駟而賻之
史記管晏傳越石父賢在
縲紲中晏子解左駟贖之

贈眼醫王生彥若

鍼頭如麥芒氣出如車軸閒關絡脉中性命寄毛粟而
况清淨眼內景含天燭琉璃貯沆瀣輕脆不任觸而子
於其間往來施鋒鏃笑談紛自若觀者頸為縮運鍼如
運斤去翳如拆屋常疑子善幻他伎雜符祝子言吾有

道此理君未矚形骸一塵垢貴賤兩草木世人方重外
妄見瓦與玉而我初不知刺眼如刺肉君省目與翳是
翳要非目目翳苟二物易分如麥菽寧聞老農夫去草
更傷穀鼻端有餘地肝膽分楚蜀吾於五輪閒蕩蕩見
空曲如行九軌道並驅無擊轂空花誰開落明月自朏
音斐
胸女六切請問樂全堂忘言老尊宿

公自注彦若樂全先生門下醫

也

素問鍼頭如芒氣出如筐黃庭經有內景外景楚詞遠
遊餐六氣而飲沆瀣張衡思元賦喻青岑之玉醴兮餐

沆瀣以爲報注沆瀣北方夜半氣也莊子徐無鬼郢人
堊漫其鼻端若蟬翼匠石運斤成風聽而斲之盡堊而
鼻不傷再見韓退之高閑上人序吾聞浮屠人善幻多
技能漢書張騫傳薛新眩人注眩全幻即今吞刀吐火
植瓜種木屠人戮馬之術皆是莊子達生其巧一也而
有所矜則重外也凡外重者內拙五輪眼科常談周禮
經涂九軌詩國風並驅從兩肩兮楞嚴經亦如翳人見
空中花翳病若除花於空滅釋名朧月未盛明也魄月
始生魄然也註承大月月生三日謂之魄承小月月生
謂之朧又晦而月見西方謂之朧朔而見東方謂之縮
朧朧健行貌縮朧遲貌

與歐育等六人飲酒

忽驚春色二分空且看樽前半丈紅苦戰知君便白羽

倦遊憐我憶黃封年來齒髮老未老此去江淮東復東
記取六人相會處引杯看劍坐生風

家語子路曰赤羽若日白羽若月按赤白羽指箭羽也
歐育武將故云黃封輦下以黃封酒為貴蓋重內醞也
李賀詩紫絲竹斷聽馬小家住錢塘
東復東杜子美詩看劍引杯長再見

觀杭州鈴轄歐育刀劍戰袍

青綾袖衫暖襯甲紅線勒帛光遶脅禿襟小袖雕鶻盤
大刀長劍龍蛇桺兩軍鼓譟屋瓦墜紅塵白羽紛相雜
將軍恩重此身輕笑履鋒鏑如一挿書生只肯坐帷幄

談笑毫端弄生殺，叫呼擊鼓催上竿。猛士應憐小兒黠，試問黃河夜偷渡。掠面驚沙寒霎霎，何如大艦日高眠。一枕清風過茗雪。

李賀詩：禿襟小袖調鸛鷀。後漢光武紀：城中亦鼓譟而出。中外合勢，震呼動天地。會大雷風，屋瓦皆飛。史記：趙奢傳：秦軍鼓譟勒兵，武安屋瓦盡震。

王伯敷所藏趙昌畫四首

歐陽歸田錄：近世名畫，趙昌畫寫生逼真。

而筆法較俗，殊無古人格致。然時亦未有其比。圖畫見聞志：趙昌字昌之，廣漢人，工畫花。果時稱絕倫。

梅花

南行渡關山沙水清練練行人已愁絕日暮集微霰慙
小梅花髣髴吳姬面暗香隨我去回首驚千片至今
開畫圖老眼淒欲泣幽懷不可寫歸夢君家倩

詩小雅如彼雨
雪先集唯霰

黃葵

弱質困夏永竒姿蘇曉

一作晚

涼低昂黃金盃照曜初

日光檀心自成暈翠葉森有芒古來寫生人妙絕誰

似昌晨粧與午醉真態含陰陽君看此花枝中有風露香

芙蓉

清飈已拂林積水漸收潦溪邊野芙蓉花水相媚好坐看池蓮盡獨伴霜菊槁幽姿強一笑莫景迫摧倒淒涼似貧女嫁晚驚衰早誰寫少年容樵人劍南老

趙昌自題其畫
云劍南樵叟

山茶

蕭蕭南山松黃葉隕勁風誰憐兒女花散火冰雪中能
傳歲寒姿古來惟邱翁趙叟得其妙一洗膠粉空掌中
調丹砂染此鶴頂紅何須誇落墨獨賞江南工

圖畫見聞志邱文播漢州人畫品降高趙輩後名潛又
徐熙鍾陵人世為江南仕族熙識度閒放以高雅自任
善畫花木禽鳥自作翠微堂記云落筆之際未嘗以傳
色暈淡細碎為工李後主特愛重其畫開寶末歸朝悉
貢上朝廷藏之祕府

寄吳德仁兼簡陳季常

東坡先生無一錢十年家火燒凡鉛黃金可成河可塞

只有霜鬢

一作鬢

無由元龍邱居士亦可憐談空說有夜

不眠忽聞河東師子吼拄杖落手心茫然誰似濮陽公
子賢飲酒食肉自得仙平生寓物不留物在家學得忘
家禪門前罷亞十頃田清溪遶屋花連天溪堂醉臥呼
不醒落花如雪春風顛我遊蘭谿訪清泉已辦布襪青
行纏稽山不是無賀老我自興盡回酒船恨君不識顏
平原恨我不識元魯山銅駝陌上會相見握手一笑三
千年

漢書郊祀志樂大言臣之師曰黃金可成而河決可塞不死之藥可得仙人可致也王注龍邱居士指陳季常河東師子事有王詭者字達觀本嘉州犍為人舊在江南武昌居名天常嘗從先生遊達觀為坡公言季常之妻柳氏最悍如每季常設客有聲妓柳氏則以杖擊照壁大呼客至為散去濮陽公子吳德仁也唐書顏真卿為平原太守安祿山反河朔盡陷唯真卿城守具備元宗聞之喜曰朕不識真卿何如人所為得如此元德秀字紫芝為魯山令蘇元明謂人曰吾不幸生衰俗所不恥者識元紫芝銅駝用索靖語詳十五卷百步洪詩注

題王逸少帖

顏張醉素兩禿翁
追逐世好稱書工
何曾夢見王與鍾
妄自粉飾欺盲聾
有如市倡抹青紅
妖歌嫚舞眩兒童

謝家夫人淡丰容蕭然自有林下風天門蕩蕩驚跳龍

出林飛鳥一掃空為君草書續其終待我他日不念念

漢書竇田傳蚡已罷朝出止車門召御史大夫韓安國
載怒曰與長孺共一禿翁何為首鼠兩端世說謝遏絕
重其姊張元常稱其妹有濟尼者並遊張謝二家人間
其優劣答曰王夫人神情散朗故有林下風氣顧家婦
清心玉映自是閨房之秀王夫人謝道韞也漢禮樂志
天門開誅蕩蕩書評王右軍書字勢雄強如龍跳天門
虎卧鳳閣又張旭草書如驚蛇入草飛鳥出
林念念用張伯英念念未暇草書語再見

書林逋詩後

通字君復杭州錢塘人
仁宗賜謚和靖先生

吳儂生長湖山曲呼吸湖光飲山綠不論世外隱君子

傭奴販婦皆冰玉先生可是絕俗人神清骨冷無由俗
我不識君曾夢見瞳子瞭然光可燭遺篇妙字處處有
步遶西湖省不足詩如東野不言寒書似西臺差少肉
平生高節已難繼將死微言猶可錄自言不作封禪書
更肯悲吟白頭曲

公自注逋臨終詩云茂陵異日求遺草猶喜初無封禪書

我笑吳

人不好事好作祠堂傍修竹不然配食水仙王一盞寒

泉薦秋菊

西臺御史李建中善真行字

和仲伯達

歸山歲月苦無多尚有丹砂奈老何
繡谷只應花自染
鏡潭長與月相磨
君方傍海看初日
我已橫江擊素波
人不我知斯我貴
不須雷雨起龍梭

漢武帝秋風詞橫中流兮揚素波
簫鼓鳴兮發棹歌
晉陶侃傳侃少時漁於雷澤網得一織梭以挂于壁有頃雷雨自化為龍而去

春日

鳴鳩乳燕寂無聲
日射西牕潑眼明
午醉醒來無一事
只將春睡賞春晴

贈袁陟

袁陟字世弼豫章人自號遜翁有集十卷嘉祐間終秘書丞

是身如虛空萬物皆我儲胡為強分別百金買田廬不見素夫子神馬載尻輿遊乎無何有一飯不願餘官湖為我池學舍為我居何以遺子孫此身自蘧蔭薰風暗楊柳秋水靜芙蕖應觀我知子不怪子知魚

莊子大宗師浸假而化予之尻以為輪以神為馬子因而乘之豈更駕哉又游于無何有之鄉柳子厚贈江華長老詩一飯不願餘跣趺便終夕後漢逸民傳劉表謂龐公曰先生若居畎畝而不肯官祿何以遺子孫乎龐公曰世人皆遺之以危今獨遺之以安唐韻蘧蔭蔭蔭一曰蔭竹席也知魚用莊子語屢見

蘇子容母陳夫人挽詞

名頌字子容元祐中為尚書左丞

蘇陳甥舅真冰玉正始風流起顏俗夫人高節稱其家
凜凜寒松映修竹鷄鳴為善日日新八十三年如一晨
豈惟室家宜壽母寔與朝廷生異人忘軀徇國乃吾子
三仕何曾知愠喜不須擁笏彊垂魚視我去來皆夢爾
誦詩相挽真區區墓碑千字多遺餘他年太史取家傳
知有班昭續漢書

爾雅謂我舅者吾謂之甥晉書衛玠傳玠妻父樂廣有海內重名議者以為婦公冰清女壻玉潤又王敦鎮豫

章長史謝鯤先雅重玠敦謂鯤曰昔王輔嗣吐金聲於中朝此子復玉振于江表微言之緒絕而復續不意永嘉之末復聞正始之音何平叔若在當復絕倒又且見三十五卷詩注詩魯頌魯侯燕喜令妻壽母韓退之曹成王碑王之遭誣在理念太妃老將驚而戚出則囚服就辨入則擁笏垂魚後漢列女傳班昭字惠班彪之女也兄固著漢書其八表及天文志未及竟而卒和帝詔昭就東觀藏書閣踵而成之又漢書始出多未能通者同郡馬融伏于閣下從昭受讀

歸宜興留題竹西寺三首

宜興常州屬縣竹西寺在揚州杜牧詩誰

知竹西路歌吹
是揚州再見

十年歸夢寄西風此去真為田舍翁
剩覓蜀岡新井水

要攜鄉味過江東

唐地理志揚州節度使杜亞自江都西循蜀岡之右引陂趨城按蜀岡有井陸羽品為第五泉相傳與岷江相通故先生曰鄉味江東指常州

道人勸飲雞蘇水童子能煎鶯粟湯暫借藤床與瓦枕
莫教孤負竹風涼

本草水蘇紫蘇假蘇三種各異水蘇一名鷄蘇蘇再見鶯粟本草名罌子粟一名米囊子秋種冬生嫩苗作蔬甚佳其實形如酒罌中有細米極白可煮粥江東人呼千葉者為巖春花或謂是罌粟別種非也其花變態本自不常有白者紅者紫者粉紅者杏黃者半紅半紫半白者艷麗可愛故曰麗春又曰賽牡丹曰錦被花詳見游

默齋
花譜

此生已覺都無事
今歲仍逢大有年
山寺歸來聞好語

野花嘯鳥亦欣然

唐王維因赦拜官詩云花迎喜氣皆知笑鳥識歡心亦
解歌按通鑑元祐六年侍御史賈易劾軾元豐末在揚
州聞先帝厭代作詩無人臣禮先生辨題詩劄子云是
歲三月六日聞先帝遺詔舉哀挂服了當當迤邐往常
州至五月初因往揚州竹西寺見百姓父老十數人道
旁語笑一人以手加額云見說好箇少年官家臣寔喜
聞百姓謳歌吾君之子出于至誠又是時臣初得請歸
耕常州蓋將老焉而淮浙間所在豐熟因作詩云此身
已覺都無事今歲仍逢大有年山寺歸來聞好語野花
嘯鳥亦欣然蓋喜聞此語故作詩書之當逢僧舍壁上

若稍有不善之意豈敢書壁上以示人乎又其時去先帝上仙已及兩月決非山寺歸來始聞之語而君錫等公然誣罔伏乞付外施行稍正國法

孟震同遊常州僧舍三首

孟震字亨之東平人嘗為黃州通判

年來轉覺此身浮又作三吳浪漫游忽見東平孟君子
夢中相對說黃州

唐元結自稱為浪士人呼之為漫郎先生君子泉銘序孟君亨之篤學而力行克有常德信于朋友一時皆稱之曰此君子也因號之孟君子君通守齊安其園有泉旱不加損水不加益因名之曰君子泉

湛湛清池五月寒小山無數碧巔峴穉杉戢戢三千本

且作凌雲合抱看

知君此去便歸耕
笑指孤舟一葉輕
若向三茅乞靈雨
半篙流水送君行

神仙傳大茅君名盈次弟名固小弟名衷太上老君拜
盈為司命真君固為定錄君衷為保命君故曰三茅君

贈常州報恩長老二首

碧玉盃盛紅馬腦
井花水養石菖蒲
也知法供無窮盡
試問禪師得飽無

薦福老懷真巧便
淨慈兩本更尖新
憑師為作鐵門限

準備人間請話人

鐵門限詳見十三卷贈
寫御容妙善師詩注

次韻答賈耘老

五年一夢南司州，饑寒疾病為子憂。
東來六月并無水，仰看古堰橫奔牛。
平生管鮑子知我，今日陳蔡誰從邱。
夜航爭渡泥水澀，牽挽直欲來瓜州。
自言嗜酒得風痺，故鄉不敢居溫柔。
定將泛愛救溝壑，衰病不復從前樂。
今年太守真臥龍，笑語炎天出冰雹。
時低九尺蒼鬚歸。

過我三閭小池閣故人改觀爭來賀小兒不信猶疑錯
為君置酒飲且哦草間秋蟲亦能歌可憐老驥真老矣
無心更秣天山禾

郡邑志唐武德三年于黃州黃陂縣置南司州七年廢
其初蓋北齊武帝置也又常潤間有閭名奔牛溫桑鄉
趙飛燕外傳語已見杜子美詩虛名但蒙寒暄問泛愛
不救溝壑辱張藉詩與君相逢莫寂寞衰老不復從前
樂襄陽記諸葛孔明為臥龍龐元士為鳳雛司馬懿操
為水鏡皆龐德公語天山在伊州伊吾縣唐薛仁貴傳
將軍三箭定天山壯士長歌入漢
關韓退之詠駕驥饑食天山禾

墨花并引

世多以墨畫山水竹石人物者未有以畫花者也
汴人尹白能之為賦一首

造物本無物忽然非所難花心起墨暈春色散毫端縹
緲形纔具扶疎態自完蓮風起顛一作畫傾倒杏雨半摧殘

獨有狂居士求為墨牡丹兼書平子賦歸向雪堂看

唐末劉訓者京師富人梁氏開國嘗假貸以給軍京師
春遊以觀牡丹為勝賞訓邀客賞花乃繫水牛數百在
前指曰劉氏墨牡丹也漢
張衡字平子作歸田賦

送竹几與謝秀才

平生長物擾天真老去歸田只此身
留我同行木上座
贈君無語竹夫人
但隨秋扇年年在
莫闔瓊枝夜夜新
堪笑荒唐玉川子
莫年家口若為親

世說王恭從會稽還王大看之見其坐六尺簞因語恭卿東來故應有此物可以一領及我恭無言大去後即舉所坐者送之既無餘便坐薦上大聞之甚驚曰吾本謂卿多故求耳對曰丈人不悉恭恭作人無長物王大

名忱傳燈錄佛曰禪師出遊或問誰為同行師舉拄杖示之曰唯有木上座耳南史陳後主每使諸貴人及女學士與狎客共賦新詩采其尤艷麗者以為曲調被以新聲宮女有容色者以千百數令習而歌之分部迭進其曲有玉樹後庭花臨春樂等其畧云璧月夜夜滿瓊樹朝朝新大抵皆美張貴妃孔貴嬪之容色玉川子盧

全也有詩云蛙蛇是
家口草石是親情

溪陰堂

白水滿時雙鷺下綠槐高處一蟬吟
酒醒門外三竿日
臥看溪南十畝陰

劉禹錫竹枝詞日出三竿春霧
消杜詩與致溪邊十畝陰再見

次韻許遵

蒜山渡口挽歸舸朱雀橋邊看道裝
供帳已應煩百兩
擊鮮無久溷諸郎問禪時到長干寺
載酒閒過綠野堂

此味只憂兒輩覺逢人休道北牕涼

王注蒜山在潤州朱雀橋在江寧府晉之建康也長干里在建康漢書疏廣傳廣受乞骸骨歸公卿大夫故人邑子設祖道供帳東都門外送者車數百兩漢陸賈傳謂其子曰與女約過女女給人馬酒食極飲十日而更一歲中以往來過它客率不過再過數擊鮮毋久潤女為也唐裴度請老治第東都作別墅具煥館涼臺號綠野堂度野服蕭散與白居易劉禹錫把酒為文章窮晝夜不問人間事或曰時王介甫閑居長干故以綠野堂比之兒輩覺用王羲之語屢見

贈章默并序

章默居士字志明生公侯家才性高爽棄家求道

不蓄妻子與世無累而父母與兄之喪貧不能舉
以是眷眷世間不能無求於人余深哀其志既有
以少助之又取其言為詩以贈其行庶幾有哀之
者

章子親未葬餘生抱羸疾朝吟噎鄰里夜淚腐茵席前
年黑花生今歲白髮出身隨日月逝恨與天地畢願求
不毛田親築長夜室難從王孫裸未忍夏后聖五陵多
豪士百萬付一擲心知義財難甘就貧友乞不辭毛粟

施行自邱山積此志苟朝遂夕死真不戚誓求無生理
不踐有為迹棄身尸陀林烏鳶任狼藉

王禹偁表蚤年多病眼有黑花晚歲多憂頭生白髮漢
楊王孫傳病且死令其子曰吾欲裸葬以反吾真又互
見本卷禮記檀弓有虞氏瓦棺夏后氏聖周鄭注火熟
曰聖燒土冶以周于棺也漢高帝葬長陵惠帝安陵景
帝陽陵武帝茂陵昭帝平陵五陵皆在長安北徙天下
豪傑之家以寔之晉書劉毅傳家無擔石之儲樗蒲一
擲百萬諸經音義尸陀林此言寒林其林幽邃而寒因
以名也在王舍城側死人多送其中莊子上為烏鳶食
下為蟻食

送穆越州

穆名珣
字東美

江海相忘十五年，羨公松柏蔚蒼顏。
四朝耆舊冰霜後，兩郡風流水石間。
舊政猶傳蜀父老，先聲已振越溪山。
樽前俱是蓬萊守，莫放高樓雪月閒。

唐元微之守越以州宅誇白樂天詩云我是玉皇香案吏謫居猶得在蓬萊今越州有蓬萊閣登州亦有蓬萊閣又倚郭乃蓬萊縣公是時已聞新命故云

贈葛葦

竹椽茅屋半摧傾，肯向蜂窠寄此生。
長恐波頭卷室去，欲將船尾載君行。
小詩試擬孟東野，大草閒臨張伯英。

消遣百年須底物故應憐我不歸耕

贈王寂

與君暫別不須嗟俯仰歸來鬢未華
記取江南煙雨裏青山斷處是君家

南都妙峰亭

千尋挂雲闕十頃含風灣
開門弄清泚照見雙銅鑲
池臺半禾黍桃李餘榛菅
無人肯回首日暮車斑斑
史君非世人心與古佛閒
時要聲利客來洗塵埃
顏新亭在

東阜飛宇臨通闢古甃磨翠壁霜林散烟鬟孤雲抱商
邱芳草連杏山俯仰盡法界逍遙寄人寰亭亭妙高峰
了了蓬艾閒五老壓彭蠡三峰照潼關均為拳石小配
此一掬慳煩公為標指免使勤躋攀

後漢五行志京都童謠曰車斑斑入河間河間姁女工
數錢莊子齊物論夫三子者猶存乎蓬艾之間韓退之
炭谷湫詩巨靈高
其捧保此一掬慳

神宗皇帝挽詞三首

文武固天縱欽明又日新
化民何止聖妙物獨稱神
政

已三王上言皆六籍醇巍巍本無象刻畫愧孤臣

未易名堯德何須數舜功小心仍致孝餘事及平戎典
禮從周舊官儀與漢隆誰知本無作千古自承風

左傳文十八年史克曰舜有大功二十而
為天子莊子知北遊至人無為大聖不作

接統真千歲膺期止一章周南稍留滯宣室遂淒涼病
馬空嘶櫪枯葵已泣霜餘生臥江海歸夢泣蒿卽

後漢律歷志閏七而盡其歲十九名之曰章按神宗在
位十九年故曰一章漢司馬遷傳是歲天子始建漢家
之封而太史留滯周南不得與從事發憤且卒而子遷
適反見父於河洛之間太史公執遷手而泣曰今天子

接千歲之統封泰山而余不得從行是命也夫漢賈誼傳後歲餘文帝思誼徵之至入見上方受釐坐宣室上因感鬼神而問鬼神之本誼具道所以然之故至夜半文帝前席按公時在謫籍而神廟升遐故云九域志河南府古蹟有嵩山北邙山先生洛中詩嵩高蒼翠北邙紅

金山妙高臺

我欲乘飛車東訪赤松子蓬萊不可到弱水三萬里不如金山去清風半帆耳中有妙高臺雲峰自孤起仰觀初無路誰信平如砥臺中老比丘碧眼照牕几巉巖玉為骨凜凜霜入齒機鋒不可觸千偈如翻水何須尋德

雲即此比邱是長生未暇學請學長不死

帝王世紀奇肱民能為飛車從風遠行湯時西風吹奇肱車至于豫州湯破其車不以示民十年東風至乃復作車遣歸之其地去玉門四萬里史記封禪書三神山者其傳在渤海中去人不遠未至望之如雲及到三神山反居水下臨之風輒引去終莫能至云神仙傳謝自然汎海求蓬萊一道士謂曰蓬萊偶弱水三萬里非飛仙不可到妙高臺取華嚴經德雲比丘所居妙高峰為義也詩小雅周道如砥傳燈錄神機交激若拄于箭鋒晉書鳩摩羅什日誦千偈韓退之詩文如翻水成華嚴經善財童子問法于五十三善知識而德雲比丘乃第一王注長生謂學仙長不死謂佛不生不滅也

贈杜介并序

元豐八年七月二十五日杜幾先自浙東還與余
相遇於金山話天台之異以詩贈之

我夢遊天台橫空石橋小秋風吹蔕露翠濕香嬾嬾應
真飛錫過絕澗度雲鳥舉意欲從之翛然已松杪微言
粲珠玉未說意先了覺來如墮空耿耿牕戶曉羣生陷
迷網獨達從古少杜叟子何人長嘯萬物表妻孥空四
壁振策念輕矯遂為赤城遊飛步凌縹緲問禪不歸舍
屢為瓠壺繞何人識此志佛眼自照瞭我夢君見之卓

爾非魔嬈仙葩發茗椀剪刻分葵蓼從今更不出閉戶
閑騷裏時從佛頂巖馳下雙蓮沼

天台石橋見十一卷次韻周郊寄鴈蕩山圖詩注宋永
初山川記寧州瘴氣蘭露四時不絕蘭者草名其上露
霑人之肉即潰爛故鮑昭有苦熱行云瘴氣畫薰體蘭
露夜霑衣孫綽遊天台賦王喬控鶴以沖天應真飛錫
以躡虛又被毛褐之森森振金策之鈴鈴又哂夏蟲之
疑冰整輕翮而思矯又赤城霞起而建標瀑布飛流以
界道釋氏要覽高僧鄧隱峰遊五臺出淮西擲錫飛空
而徃西天比丘持錫有二十五威儀凡至室中不得著
地必挂于壁牙故釋子稱遊行僧為飛錫安住僧為挂
錫支遁天台山銘序云往天台當由赤城山為道徑會
稽記赤城山石色皆赤狀似雲霞倦遊錄金鑒長老問
歐陽景取書索米于玉泉長老景授一緘及詩一絕云

金鑒來覓玉泉書金玉相逢價倍珠到了不干藤蔓事
壺蘆自去經壺蘆先生十八羅漢頌後跋佛滅度後閻
浮提衆生剛狠自用莫肯信入故諸聖賢皆隱不見獨
以像設遺言提引未悟而峨嵋五臺廬山天台獨出光
景幽異使人了然見之軾家藏十六羅漢像每談養
供則化為白乳或凝為花木桃李芍藥僅可指名

次韻孫莘老斗野亭寄子由在邵伯堰

寰宇記邵伯堰

在揚州廣陵縣云謝安所築按安傳及至新城築埭于城北人追思之名為邵伯埭然則所謂新城豈乃廣陵耶

落帆謝公渚日脚東西平孤亭得小憩暮景含餘清坐
待斗與牛錯落挂南甍老僧如夙昔一笑意已傾新詩

出故人舊事疑前生吾生七往來送老海上城逢人輒
自哂得魚不忍烹似聞績溪老復作東都行小詩如秋
菊艷艷霜中明過此感我言長篇發春榮

晉書阮裕赴山陵事畢便還諸人相與追之至方山不
相及劉惔歎曰我入東正當泊安石渚下耳不敢近思
曠傍唐房琯開元中為盧氏宰與道士邢和璞遇夏日
入廢佛寺鑿池得甕中所藏婁師德與永禪師書笑曰
頗憶此邪因悵然悟前生為永禪師按先生既自黃移
汝子由亦自監錫州鹽酒稅移知歙之績溪先生未至
汝繼得請歸常州尋起知登州而子由自績溪以校書
郎被召入京亦須由召伯堰至東都故於篇末及之

送楊傑

并序王注元祐二年高麗僧義天航海
聞道至明州傳云義天棄王位出家上

疏乞徧歷叢林問法受道有詔朝奉郎楊傑
次公館伴所至吳中諸刹皆迎餞如王臣禮
至金山僧了元乃林坐受其大展次公驚問
其故了元曰義天亦異國僧耳叢林規緘如
是不可易朝廷聞之以了元知大體

無為子嘗奉使登太山絕頂雞一鳴見日出又嘗
以事過華山重九日飲酒蓮華峰上今乃奉詔與
高麗僧統游錢塘皆以王事而從方外之樂善哉
未曾有也作是詩以送之

天門夜上賓出日萬里紅波半天赤歸來平地看跳丸

一點黃金鑄秋橘太華峰頭作重九天風吹灑黃花酒
浩歌馳下腰帶鞶醉舞崩崖一揮手神游八極萬緣虛
下視蚊雷隱汙渠大千一息八十返笑厲東海騎鯨魚
三韓王子西求法鑿齒彌天兩勑敵過江風急浪如山
寄語舟人好看客

太山記太山盤道屈曲而上凡五十餘盤經小天門大
天門仰視天門如穴中視天牕矣自下至古封禪處凡
四十里山頂西崑為仙人石閣東崑為介邱東南崑名
曰觀者雞一鳴時見日始欲出長三丈所腰帶鞶華山
地名李白大鵬賦序余昔于江陵見天台司馬子微謂
余有仙風道骨可與神遊八極之表詩國風深則厲淺

則揭注牽衣涉之也爾雅絲帶以上為厲三韓韓有三
種曰馬韓曰辰韓曰升韓皆高麗也晉書釋道安與習
鑿齒相見鑿齒曰四海習鑿齒道安曰彌天釋道安人
以為名對摠言唐令狐楚鎮揚州處士張佑常與狎宴
楚視佑改令曰上水船船底破好客莫倚拖
立佑應聲曰下水船船底破好看客莫倚拖

次韻送徐大正

公自注嘗與余約卜鄰於江淮間將赴登州同舟至山陽以詩

見送
留別

別時酒醖照燈花知我歸期漸有涯去歲渡江萍似斗
今年並海棗如瓜多情明月邀君共無價青山為我賒
千首新詩一竿竹不應空釣漢江槎

家語楚昭王渡江江中有物大如斗直觸王舟舟人取之王使人問于孔子孔子曰此為萍實者也異時小兒謠曰楚王渡江得萍實大如斗赤如日剖而食之甜如蜜漢書郊祀志李少君曰臣嘗遊海上見安期生食臣棗大如瓜

楊康功有石狀如醉道士為賦此詩

楚山固多猿青者黥而壽化為狂道士山谷恣騰蹂誤入華陽洞竊飲茅君酒君命囚巖閒巖石為械杻松根絡其足藤蔓縛其肘蒼苔眯其目叢棘哽其口三年化為石堅瘦敵瓊玖無復號雲聲空餘舞杯手樵夫見之

笑抱賣易升斗楊公海中仙世俗那得友海邊逢姑射
一笑微俛首胡不載之歸用此頑且醜求詩紀其異本
末得細剖吾言豈妄云得之亡是叟

仙經句曲山即三十六洞天之第八洞名曰華陽洞大
茅君之所治也在江寧府句容縣互見本卷前三茅注
司馬相如傳子虛虛言也為楚稱烏有先生者烏有此
事也為齊難亡是公者亡是人也欲明天子之義故虛
藉此三人為辭按公詩意言孫化道士道士又化石止設虛辭為稱耳

迨作淮口遇風戲用其韻

我詩如病驥悲鳴向衰草有兒真驥子一噴羣馬倒養

氣勿吟哦聲名忌太早風濤借筆力勢逐孤雲掃何如
陶家兒遶舍覓梨棗君看押彊韻已勝郊與島

杜子美詩驥子好男兒前年學語時注驥子宗武小名
又贈竇侍御詩驥之子鳳之雛穆天子傳天子東遊于
黃澤宿于西洛歌曰黃之陀其馬歟沙皇人威儀黃之
澤其馬歟玉皇人壽穀歟即噴字王子韶雞跼集王筠
字元禮為詩能押彊
韻郊島孟郊賈島也

次韻徐積

徐積字仲車

殺雞未肯邀季路裹飯先須問子來但見中年隱槐市
豈知平日賦蘭臺海山入夢方東去風雨留人得暫陪

若說峨眉眼前事故鄉何處不堪回

莊子大宗師子輿與子桑友而霖雨十日子輿曰子桑殆病矣裹飯而往食之按子桑非子來也豈先生偶誤記邪淮南子槐市學也樹以青槐三輔黃圖明堂辟雍為博士舍三十區為會市但列槐樹數百行諸生朔望會此市各持其郡所出物及經書所與賈買雍容揖讓議論槐下蘭臺用宋玉風賦語再見

元豐七年有詔京東淮南築高麗亭館密海二

州騷然有逃亡者明年軾過之歎其壯麗留一

絕云

簷楹飛舞垣牆外桑柘蕭條斤斧餘盡賜昆邪作奴婢

不知償得此人無

漢汲黯傳匈奴渾邪王來降賈人與市者坐當死五百餘人黯入請閒見高門曰夫匈奴攻當路塞絕和親中為陛下得胡人皆以為奴婢賜從軍死者家兩獲目與之以謝天下塞百姓之心今縱不能又徵文殺無知者五百餘人臣竊為陛下弗取也

過密州次韻趙明叔喬禹功

先生依舊廣文貧老守時遭醉尉嗔
汝輩何曾堪一笑
吾儕相對復三人黃雞唱曉淒涼曲
白髮驚秋見在身
一別膠西舊朋友扁舟歸釣五湖春

唐鄭虔為廣文館博士醉尉用李廣屏居藍田事俱已見詩意以鄭虔比趙以李廣比喬也杜子美詩何當官曹清爾輩堪一笑唐牛僧孺詩且門樽前見在身

再過常山和昔年留別詩

偃僂山前叟迎我如迎新那知夢幻軀念念非昔人江湖久放浪朝市誰相親卻尋泉源去桃花逢避秦

左傳昭七年正考父鼎銘云一命而僂再命而偃楞嚴經日月歲時念念遷變

再過超然臺贈太守霍翔超然臺在密州舊因城以為臺公守密州

葦而新之
自為之記

昔飲雩泉別常山天寒歲在龍蛇間山中兒童拍手笑
問我西去何當還十年不赴竹馬約扁舟獨與魚蓑閒
重來父老喜我在扶挈老幼相遮攀當時襁褓皆七尺
而我安得留朱顏問今太守為誰歟護羌充國鬢未斑

公自注翔自言在
熙河作屯田有功

躬持牛酒勞行役無復杞菊嘲寒慳

超然置酒尋舊迹尚有詩賦饒堅頑孤雲落日在馬耳

照耀金碧開煙鬟

却當从扶
或作却

淇自古北流水跳波下瀨

鳴玦環顧公談笑作石埭坐使城郭生溪灣

按公以熙寧丙辰冬末罷知密州正在辰巳之間故借
用龍蛇字周禮鄉大夫辨夫家之可任者國中自七尺
以至六十野自六尺以及六十有五疏云七尺謂年二
十六尺謂年十五漢趙充國年七十餘以後將軍出平
羌戎條上留田便宜十二事杞菊公起然臺記云始至
之日歲比不登盜賊滿野獄訟充斥而齋廚索然日食
杞菊公又有後杞菊賦大意識公使庫之儉陋也蘄按
鄴道元水經注有扶淇水無卻淇水道元濰水條下云
又北左合扶淇之水水出西南常山東北流注濰又云
濰自箕縣北迤東武縣西北流合扶淇之水晏謨伏琛
云東武城西北二里濰水者即扶淇之水也按此則公
詩所用的是扶淇無疑故曰自古北流水也又考漢地
里志琅邪郡有却縣師古曰音夫又音扶又二十六卷
送喬全詩隨師東遊濰郡王注濰郡密州二水名則
扶淇似可亦作却淇至卻淇字別無據依當是
集本訛却為卻諸注家相沿不覺耳今改正

施註蘇詩卷二十三

欽定四庫全書

施註蘇詩卷二十四

宋 蘇軾 撰

施元之原註

武進邵長蘅刪補

詩四十三首

起自登州還朝洎元祐丙寅改元在西掖作
本卷用王鞏韻送具姪震以後詩如干首施
註缺
今補

海市

并引

予聞登州海市舊矣父老云常出於春夏今歲晚
不復見矣予到官五日而去以不見為恨禱於海
神廣德王之廟明日見焉乃作此詩

東方雲海空復空羣仙出沒空明中蕩搖浮世生萬
象豈有貝闕藏珠宮心知所見皆幻影敢以耳目煩
神工歲寒水冷天地閉為我起蟄鞭魚龍重樓翠阜
出霜曉異事驚倒百歲翁人間所得容力取世外無

物誰為雄率然有請不我拒信我人厄非天窮潮陽
太守南遷歸喜見石廩堆祝融自言正直動山鬼豈
知造物哀龍鍾信眉一笑豈易得神之報汝亦已豐
斜陽萬里孤島沒但見碧海磨青銅新詩綺語亦安
用相與變滅隨東風

楚辭九歌紫貝闕兮珠宮已見金剛經一切有為法如
夢幻泡影唐韓愈傳諫佛骨事貶潮州刺史又謁衡岳
詩潛心默禱若有應豈非正直能感通須臾靜掃衆
出仰見突兀撐青空紫蓋連延接天柱石廩騰擲堆祝
融蘇氏演義龍鍾謂不昌熾不翹舉如鬢髮拉搭之類
漢薛宣傳欲君自圖進退可復信眉於後十洲記蓬萊

山在碧海水中
皆碧故曰碧海

登州孫氏松堂

萬松誰種已攰攰半嶺蒼雲映此邦
露重珠璣蒙翠蓋
風來石齒碎寒江
浮空兩竹橫南閣
倒影扶桑射北牕
坐待夕烽傳海嶠
重城歸去踏逢逢

梁元帝纂要曰景在上曰反景在下曰倒影
司馬相如大人賦貫列缺之倒影兮涉豐隆之滂瀼
注倒影氣去地四千里其景皆倒在下也詩大雅鼙鼓
逢逢韓退之詩不踏曉鼓朝安眠聽逢逢

過萊州雪後望三山

東海如碧環西北卷登萊雲光與天色直到三山回我
行適冬仲薄雪收浮埃黃昏風絮定半夜扶桑開參差
太華頂出沒雲濤堆安期與羨門乘龍安在哉茂陵秋
風客勸爾麾一杯帝鄉不可期楚些招歸來

劉禹錫詩水遶亭臺碧玉環地志萊州掖縣戴三山在
海之南岸史記封禪書秦始皇東遊海上行禮祠名山
川及八神求仙人羨門之屬又八神四曰陰主祠三山
又樂大敢為大言處之無疑大言曰臣嘗往來海中見
安期羨門之屬願以臣為賤不信臣漢紀武帝葬茂陵
李賀金銅仙人歌茂陵劉郎秋風客晉孝武帝紀長星
勸汝一杯酒陶淵明歸去來辭富貴非吾願帝
鄉不可期宋玉招魂魂兮歸來君無上天些

遺直坊并引

富公之客李君諱常登人也故太守李公諱師中
榜其閭曰遺直而其子大方求詩於軾為賦一首
使君不浪出羔鴈親叩門先生但清坐薤水已多言當
時邦人化市無晨飲豚歲月曾幾何客主皆九原魯經
有遺歎楚些無歸魂我作遺直詩過者式其藩

禮記飾羔鴈者以饋後漢陳實傳子紀紀子羣弟堪父
子並著高名同時旌命羔鴈成羣後漢龐參傳為漢陽
守郡人有任棠者隱居教授參到先候之棠不與言但
以薤一本水一盂置戶屏前自抱孫兒伏于戶下參思

其微意良久曰是欲曉太守也水者欲吾清拔大本薤者欲吾擊強宗抱兒當戶者欲吾開戶恤孤于是歎息而還家語初魯之貶羊有沈猶氏者常朝飲其羊以詐市人孔子為政沈猶氏不敢飲其羊左傳昭十四年仲尼曰叔向古之遺直也

次韻趙令鑠

趙令鑠字伯聖一云字景貺熙寧中以諸衛將軍對策學士院改職

方員
外郎

東坡已報六年穰惆悵紅塵白首郎枕上谿山猶可見
門前冠蓋已相望故人年少真瓊樹落筆風生戰堵牆
端向甕間尋吏部老來專以醉為鄉

史記貨殖傳歲在金穰水毀木饑火旱莊子庚桑楚北
居畏壘之山居三年畏壘大穰先生黃州凡跨六年
故云漢文帝紀遣使者冠蓋相望結轡于道晉王戎傳
戎目王衍神姿高澈如瑤林瓊樹杜子美莫相疑行集
賢學士如堵牆觀我落筆中書堂指趙對策事也甕間
用晉畢卓事已見二十一卷岐亭詩注王績醉鄉記阮
嗣宗陶淵明等十數人
並游于醉鄉沒身不返

次韻王定國得穎倅二首

仙風入骨已凌雲秋水為文不受塵一噫固應號地籟
餘波猶足挂天紳買牛但自捐三尺射鼠何勞挽六鈞
莫向百花潭上去醉翁不見與誰親

漢司馬相如傳奏大人賦天子大說飄飄有凌雲氣游
天地之間意杜子美詩大兒九齡色清澈秋水為神玉
為骨禹貢餘波入于流沙孟郊詩簷溜擲天紳韓退之
詩是時雨初霽懸瀑垂天紳三國魏杜襲傳千鈞之弩
不為鼪鼠發機再見左傳定八年顏高之弓六鈞注云
三十斤為鈞百花潭疑當在潁州歐陽文忠公自號醉
翁致仕居
清潁尾

滔滔四海我知津
每媿先生植杖耘
自少多言晚聞道
從今閉口不論文
艷翻白獸樽中酒
歸煮青泥坊底芹
要識老僧無盡處
牀前牛蟻不曾聞

晉禮樂志正旦元會設白獸樽於殿庭蓋上施白獸有
能獻直言者發此樽飲之時哲宗即位求言上書者以

千計司馬溫公考定孔宗翰居第一定國第二稍進用
故用白獸尊事杜子美詩飯煮青泥坊底芹仙傳拾遺
周末殺萇弘于蜀其血碧色入地化為碧玉數里內土
皆青色今蜀地有青泥坊即弘死處傳燈錄壽州樹禪
師云伊伎倆有窮我不見不聞
無盡牛蟻用殷仲堪父事再見

次韻趙令鑠惠酒

神山無石髓生世悲暫寓坐待玉膏流千載真旦暮青
州老從事焉上非所部惠然肯見從知我憎市酤開餅
自洗盞肴核誰與具門前聽剝啄烹魚得尺素

東方朔十洲記瀛洲有蘊玉石出泉如酒味甘名玉酒
或名玉膏飲之數升令人長生莊子齊物論萬世之後

而一遇大聖知其解者是旦暮
遇之也石髓青州注並再見

送范純粹守慶州

范純粹字德孺文正公之季子哲宗即位以直龍圖閣京

東轉運副使代其兄忠宣公守慶請棄所侵西夏地曰爭地未棄則邊隙無時可除于是還四砦而夏人服紹聖後以棄地故又生黨錮屢起屢仆終龍圖閣直學士此詩言文正公在仁宗時李元昊叛命訖以計降之德孺守慶州竟如先生所期云

才大古難用論高常近迂
看君趙魏老乃為滕大夫
浮雲無根蒂黃潦能湏臾
知經幾成敗得見真賢愚
羽旄照城闕談笑安邊隅
當年老使君赤手降於菟
諸郎更

何事折箠鞭其雛吾知鄧平叔不關月支胡

孫樵與賈希逸書玉川子月蝕詩韓吏部進學解莫不倚天拔地句句欲活讀之如赤手捕長蛇不施鞢騎生馬老使君指文正也後漢鄧禹傳帝徵禹還勅曰赤眉無穀自當來東吾折箠笞之非諸將憂也又鄧訓傳字平叔為護羌校尉先是小月氏胡分居塞內勝兵者二千騎每與羌戰常以少制多時迷吾子迷唐與武威種羌合兵萬騎來至塞下欲脅月氏胡訓擁衛稽故令不得戰又令開城及所居園門悉驅羣胡妻子納之嚴兵守衛羌掠無所得因即解去由是湟中諸胡皆言漢家常欲闔我曹今鄧使君待我以恩信開門納我妻子咸歡喜叩頭曰惟使君所命

次韻王震

攜文過我治平閒霧豹當時始一斑聞道吹噓借餘論
故教流落得生還清篇帶月來霜夜妙語先春發病顏
詩酒暮年猶足用竹林高會許時攀

劉向列女傳陶答子相陶家教不修而富其妻曰妾聞
南山有豹霧雨七日不下食欲以澤其毛衣而成文章
也晉書王獻之年數歲嘗觀門生擣蒲曰南風不競門
生曰此郎亦管中窺豹時見一斑後漢鄭太傳孔公緒
清談高論噓枯吹生南史謝朓傳是子聲名未立應共
獎成無惜齒牙餘論晉嵇康傳所與神交者阮籍山濤
預其流者向秀劉伶籍兄子咸王戎遂為竹林之遊世
謂竹林七賢按震字子發定國之姪也故以咸為比

次韻王定國謝韓子華過飲

楚有孫叔敖長城隱千里哀哉練裙子負薪躡破履豈
無故交親逝去如覆水不如老優孟談笑託諧美世家
不可恃如倚折足几祥符有賢相手握天下砥懿敏亦
名公三貴德爵齒蓋棺今幾日公子誰料理誰要卿料
理欲說且止止宅相開府公久為蒼生起如何垂老別
冰盤餽蒼耳親嫌妨鶚薦相對發微泚新詩如彈丸脫
手不移晷我亦老賓客苦語落紈綺莫辭三上章有道
貧賤恥

唐李勣傳帝嘗曰我用勣守并突厥不敢南向賢長城遠矣南史檀道濟傳壞汝萬里長城又任昉傳昉卒後有子不能自振生平舊交莫有收恤西華冬月著葛帔練裙道逢劉孝標泣然矜之為著廣絕交論優孟事在史記滑稽傳屢見按定國大父魏國文正公相真宗于景德祥符間四方底平懿敏公事仁宗出入侍從將帥三十餘年法華經止止不須說我法妙難思晉魏舒傳外家竇氏起宅相者云當出貴甥舒曰當為此宅相韓子華乃王氏甥後漢禰衡傳孔融上疏薦衡曰鸞鳥累百不如一鶚使衡立朝必有可觀杜子美墜馬歌甫也諸侯老賓客班氏叙傳綺襦紈袴之間

惠崇春江晚景二首

圖畫見聞志建陽僧惠崇尤工小景為寒汀遠渚蕭

灑虛曠之象人所難到

竹外桃花三兩枝
春江水暖鴨先知
萋萋滿地蘆芽短
正是河豚欲上時

梅聖俞河豚詩春洲生荻牙春岸
飛楊花河豚於此時貴不數魚蝦

兩兩歸鴻欲破羣
依依還似北歸人
遙知朔漠多風雪
更待江南半月春

次韻周邠

周邠字開祖已見第六卷公
倅杭相與倡酬故結句云

南遷欲舉力田科
三徑初成樂事多
豈意殘年踏朝市
有如疲馬畏陵坡
羨君同甲心方壯
笑我無聊鬢已皤

何日西湖尋舊賞
淡煙疎雨暗漁蓑

次韻胡完夫

胡完夫名宗愈晉陵人副樞宿之姪

青衫別淚尚爛斑
十載江湖困抱關
老去上書還北闕
朝來拄笏看西山
相從杯酒形骸外
笑說平生醉夢間
萬事會須咨伯始
白頭容我占清閒

抱關用蕭望之事拄笏用王徽之事並已見莊子德充符子與我游於形骸之內而子索我於形骸之外不亦過乎後漢胡廣傳字伯始達練事體明解朝章京師諺曰萬事不理問伯始天下中庸有胡公

次韻錢穆父

欽宗在東宮時所藏東坡帖甚富多有宸翰魚題即位後出二十軸

賜吳少宰元中元中為曾文清妹婿以十軸
歸之今藏于元孫戶部郎樂道槃宿為餘姚
嘗刻石縣齋墨蹟云病客來從飯潁山集本
作遷客一言置我老劉間集本作二劉諸家
所註皆引石勒載記云朕當在二劉之間耳
先生自註云公行軾告詞引董仲舒劉向事
此註集本亦不載今補穆父名勰吳越讓
王諸孫五歲日誦十言十三歲制舉業成既
中秘閣選廷對入等矣會王介甫惡孔經父
策罷科不得第以蔭入官神宗召對將任以
清要介甫知其必不附已命權鹽鐵判官元
祐初拜中書舍人故有故人飛上金鑒殿之
句哲宗蒞政入翰林章子厚當軸憾其疇昔
謫詞有怏怏非少主之臣硜硜無大臣之節
二語罷知池州以卒
後追復龍圖閣學士

老入明光踏舊班染須那復唱陽關故人飛上金鑾殿

病

集作

客來從飯顙山大筆推君西漢手一言置我老

劉

集作

閒

公自注公行軼告詞

便須置酒呼同舍看賜

飛龍出帝閑

漢武帝紀太初四年秋起明光宮杜子美十二月一日詩明光起草人所羨韋執誼翰林內志至德以後置學士東院于金鑾殿西隨上所而有遷取其近便李太白詩承恩初入銀臺門著書獨在金鑾殿晉王珣傳夢人以大筆如椽與之既覺語人云此當有大手筆事王注劉向劉歆父子俱以文章學術稱又晉書載記石勒謂徐光曰朕當在二劉之間耳衛按公自注云云則王注非唐兵志天子御馬總有十二閑其後禁中又增置飛

龍廡

次韻穆父舍人再贈之什

此首集本不載今補入是時先生為起

居舍人故用唐志所載起居郎執筆記事

詔語春溫昨夜班
屋頭鳴鳩便闌闌
遊仙夢覺月臨幌
賀雨詩成雲滿山
憐我白頭來仗下
看君黃氣發眉間
鳳池故事同機務
火急開樽及尚閑

續漢禮儀志立春之日下寬大詔書唐儀衛志衛凡朝會之仗三衛番上分為五仗一曰供奉仗二曰親仗三曰勲仗四曰翊仗五曰散手仗每月以四十六人立內廊閣外號曰內仗以左右金吾將軍當上中郎將一人

抑之朝罷皇帝步入東序門然後放仗又百官志每仗下議政事起居郎一人執筆記錄於前韓退之詩眉間黃色見歸期相書喜色紅黃晉荀勗傳奪我鳳凰池何賀我耶唐百官志中書舍人叅議表章百司奏議考課皆預裁焉

再次韻答完夫穆父

公自注二公自言先世同在西掖

掖垣老吏

一作史

識郎君並轡天街兩絕塵汗血固應生

有種夜光那復困無因豈知西省深嚴地也着東坡病瘦身免使謫仙明月下狂歌對影只三人

劉棻詩誰謂相去遠隔此西掖垣注引應劭漢官儀曰左右曹受尚書事前世文士以中書在右因謂中書為

右曹又稱西掖垣李太白月下獨酌詩舉杯邀明月對影成三人

次韻答滿思復

滿思復字中行元豐末為左司郎中括宗即位東坡自登州召

入為郎禮部旬餘擢起居舍人中行並命為起居郎又同省而中行為東陽人故有跛牂

隨赤驥嘯鳥巷有顏之句

自甘茅屋老三閒豈意彤廷綴兩班紙落雲煙供醉後
詩成珠玉看朝還誰言載酒山無賀記取嘯鳥巷有顏
但恐跛牂隨赤驥青雲飛步不容攀

杜子美和賈至詩朝罷香煙攜滿袖詩成珠玉在揮毫
載酒用李白稽山無賀老句注屢見異苑東陽顏鳥以

純孝著聞父死負土成墳羣烏銜土助之烏口皆傷
因名縣曰烏傷國經云即今義烏也顏烏秦時人

送戴蒙赴成都玉局觀將老焉

拾遺被酒行歌處野梅官柳西郊路聞道華陽版籍中
至今尚有城南杜我欲歸尋萬里橋水花風葉暮瀟瀟
芋魁徑尺誰能盡檜木三年已足燒百歲風狂定何有
羨君今作峨眉叟縱未家生執戟郎也應世出埋輪守
莫欺老病未歸身玉局他年第幾人會待子猷清興發
還須雪夜去尋君

杜子美西郊詩時出碧雞坊西郊向草堂市橋官柳細
江路野梅香子美至德二年拜右拾遺見唐本傳唐地
理志成都府蜀郡華陽縣本蜀縣乾元元年更名王子
詔鷄跖集韋曲杜鄠近長安諺云城南韋杜去天尺五
趙抃成都集記萬里橋諸葛孔明於此送吳使張溫曰
此水下至揚州萬里因以為名或云孔明送費禕聘吳
至此曰萬里之行自此始二說雖殊要之因孔明得名
杜子美詩萬里橋西一草堂百花潭水即滄浪漢翟方
進傳童謡曰飯我豆食羹芋魁貨殖傳卓氏遷之蜀曰
吾聞岷山下沃野下有踐鵠至死不饑顏師古注跋
鵠謂芋也蜀本記蜀人以檀木為薪種之三年可燒杜
子美詩飽聞檀木三年大韓退之詩男兒不再壯百歲
如風狂漢揚雄傳揚雄字子雲蜀郡成都人也又雄待
詔歲餘奏羽獵賦除為郎後漢張綱傳漢安元年選遣
八使循行風俗綱獨理其車輪於洛陽都亭曰豺狼當
道安問狐狸遂條奏大將軍冀十五事京師震悚按雄

與網俱蜀人詩故云北斗經地神湧出扶一玉局而作
高座成都集記永壽元年老君駕龍車張道陵乘白鶴
同至太皞玉女修大丹之所感地神湧出局腳玉林老
君升座說北斗經開元中道士羅上清奏重修殿宇本
名玉局治避高宗諱改為玉局化
國朝為玉局觀置提舉主管官

送陳睦知潭州

陳睦字和叔嘉祐六年第進士
初和叔為兩浙提刑嘗駁勘裴

氏婢夏沈香獄差秀州倅張若濟重勘夏沈
香遂坐死杜陳咸三掾亦得衝替語在第七
卷公時倅杭賦詩送之云殺人無驗中不快
此恨終身恐難了蓋指和叔若濟云茲送和
叔所述者止少時登臨相從而已並
無一語及其人則不與之意可見

華清縹眇浮高棟上有緬林藏石甕一杯此地初識君

千巖夜上同飛鞚君時年少面如玉一飲百觚嫌未痛
白鹿泉頭山月出寒光潑眼如流汞朝元閣上酒醒時
卧聽風鸞鳴鐵鳳舊游空在人何處二十三年真一夢
我得生還雪髯滿君亦老嫌金帶重有如社燕與秋鴻
相逢未穩還相送洞庭青草渺無際天柱紫蓋森欲動
湖南萬古一長嗟付與騷人發嘲弄

唐地理志京兆府昭應縣注有宮在驪山下正觀十八
年置咸亨二年始名溫泉宮天寶六載更曰華清宮杜
牧之華清宮辭神仙高縹眇白樂天詩黃夾纈林寒有
葉鄭嵎津陽門詩注云津陽門在華清宮之外闕石鑿

寺崑下有天然石形如甕以貯飛泉寺僧於上層飛樓
中懸轆轤斜引修綆泉出於紅樓橋木之杪互見十九
卷注又朝元閣南即老君見處述征記長安東則驪山
西則白鹿原而驪山中又有白鹿觀云陸倕石闕銘蒼
龍元武之制銅雀鐵鳳之工薛綜西京賦注圓闕上作
鐵鳳皇令張兩翼舉頭敷尾故老杜贊公房詩曰鐵鳳
森翔翔又贈崔評事詩曰陰沉鐵鳳闕杜祁公詩老嫗
金帶重再見杜子美詩洞庭猶在目青草續為名注青
草湖與洞庭湖相連在岳州衡山記天柱峯高四千一
百尺夏禹理水刻石峯上戴蓋峯多隱雲表常有白鶴
仙童飛翔其側杜子美詩
湖南清絕地萬古一長嗟

用前韻答西掖諸公見和

雙猊蟠礎龍纏棟金井轆轤鳴曉甕小殿垂簾碧

一作白

玉鉤大宛立仗青絲鞵風馭賓天雲雨隔孤臣忍淚肝
腸痛羨君意氣風生坐落筆縱橫盤走汞上樽日日瀉
黃封賜茗時時開小鳳閉門憐我老太元給札看君賦
雲夢金奏不知江海眩木瓜屢費瓊瑤重豈惟蹇步困
追攀已覺侍史疲奔送春還宮柳腰支活雨一作水入御
溝鱗甲動借君妙語發春容顧我風琴不成弄

梅聖俞和人早朝詩耽耽玉宇龍纏棟霽霽金爐獸齧
環李賀詩轆轤呶啞轉鳴玉戴延之西征記洛陽太極
殿有金井欄金博山轆轤蛟龍負山於井上漢張騫傳
大宛有善馬唐顏真卿傳太宗置立仗馬二有急奏須

乘者聽漢翟方進傳賜上尊酒黃封內庫官法酒也歐陽公龍茶錄後序茶之為物至精而小團又其精者仁宗南郊致齋之夕中書密院各四人共賜一餅宮人剪金為龍鳳貼其上兩府八家分割以歸嘉祐七年明堂始人賜一餅茶經云茗茶之晚取者集韻亦云左傳成十二年金奏作于下史記孟嘗君傳孟嘗君待客坐語而屏風後嘗有侍史主記君所與客語杜子美漫興詩隔戶楊柳弱嫋嫋恰似十五女兒腰潘閭風琴詩到底不能成一曲

次韻王覲正言喜雪

王覲字明叟泰州如皋人第進士元祐初呂正獻范

忠宣薦其可大任擢右正言進司諫極言當位者姦邪害正使一二元老不得行其志章數十上公論躋之公時為右史故云我方執筆待君猶伏閣爭云云

聖人與天通有詔寬獄市好語夜喧街濕雲朝覆砌紛
然退朝後色映宮槐媚欲誇剪刻工故上朱藍袂我方
執筆待一作侍未敢書上瑞君猶伏閣爭高論亦少慰霏
霏止還作盎盎風與氣神龍久潛伏一怒勢必倍行當
見三白拜舞謹萬歲歸來飲君家酣詠追既醉

漢曹參傳以齊獄市為寄慎勿擾也韓退之李花詩誰
將平地千堆雪剪刻作此連天花吳陸暢雪詩天人寧
底巧剪冰作飛花宋書大明五年正月朔賀雪落太宰
義恭衣有六出奏以為瑞上說李郢雪霽登樓詩城樓
飛雪定猶看謝莊衣注云謝莊朝迴衣為飄雪印點時
人翫之為風韻見宋書符瑞志舊唐書陽城為諫議大

夫伏閣上疏杜牧李賀詩集序春之盜盜不足為其和也漢武帝紀元封元年詔曰翌日親登嵩高御史乘屬在廟旁吏卒咸聞呼萬歲者三毛詩既醉太平也醉酒飽德人有士君子之行焉

和蔣發運

之奇字穎叔宜興人

夜語翻千偈書來又一言此身真佛祖何處不義軒船穩江吹坐樓空月入樽遙知思我處醉墨在頽垣

送表弟程六知楚州

公母成國太夫人程氏眉山著姓其姪之才字正輔

第二之元字德孺第六即楚州也之邵字懿叔第七

炯炯明珠照雙壁當年三老蘇程石里人下道避鳩杖

刺史迎門倒舄舄我時與子皆兒童狂走從人覓梨栗
健如黃犢不可恃隙過白駒那暇惜醴泉寺古垂橘柚
石頭山高暗松櫟諸孫相逢萬里外一笑未解千憂集
子方得郡古山陽老手生風謝刀筆我正含毫紫微閣
病眼昏花困書檄莫教印綬繫餘年去掃墳墓當有日
功成頭白早歸來共藉梨花作寒食

後漢禮儀志中秋之月縣道案戶比民年七十者授以
玉杖杖端以鵠鳥為飾鵠不噎之鳥也欲老人不噎杜
子美百憂集行憶昔十五心尚孩健如黃犢走復來庭
前八月梨棗熟一日上樹能千回唐地里志楚州本江

都郡之山陽地漢趙廣漢傳見事風生蕭何傳起秦刀筆吏顏師古曰刀所以削書也古者用簡牒故吏皆以刀筆自隨唐百官志開元元年改中書省為紫微按公時為中書舍人爾雅書記曰書說文檄二尺書也釋名檄激也下官激迎其上之書文也漢嚴延年傳行矣去汝東歸掃除墳墓耳

和人假山

上黨攙天碧玉環絕河千里抱商顏試觀煙雨三峰外
都在靈仙一掌間造物何如童子戲寫真聊發使君閑
何當挈取西征去畫作圍林六曲山

漢溝洫志引洛水至商顏下顏師古曰商顏商山之顏也楊敬之華山賦天雨初霽三峰相差張平子西京賦

巨靈高掌厥跡猶存山志華山首陽山黃河流於二山
間相傳此本一山當河河水過而曲行河神巨靈以手
擘開其上以足蹈離其下以通流今華山有手跡仙掌
峰是也法華經乃至童子戲聚沙為佛塔李賀屏風曲
團迴六曲
抱膏蘭

送王伯敬守號

王伯敬
名廷老

華山東麓秦遺民當時依山來避秦至今風俗含古意
柔桑淶水招行人行人掉臂不回首爭入崤函土囊口
惟有使君千里來欲飲三堂無事酒三堂本來一事無
日長睡起聞投壺牀頭硯石開雲月澗底松根斲雪腴

山棚盜散人安寢
勸買耕牛發陳廩
歸來只作水衡卿
我欲携壺就君飲

楊文公談苑華山南有川廣袤數百里連山洞壑不知其極人有登蓮華峰絕頂俯瞰人煙舍屋相望四時常有花木疑靈仙之窟宅又云秦人避難者居此其裔也史記孟嘗君傳馮驩曰君獨不見夫朝趨市者乎明旦側肩爭門而入日暮之後過市朝者掉臂而不顧又秦本紀孝公據崤函之固擁雍州之地宋玉風賦起於青蘋之末盛怒於土囊之口唐文粹呂溫虢州三堂記云開元初天子思二南之風並選宗英共持理柄虢大而近匪親不居時惟五王出入相授承平易理逸政多暇考卜惟勝作為三堂三者明臣子在三之節堂者勵宗室克構之義韓退之和虢州劉使君三堂新題詩序云虢州刺史宅連水池竹林往往為亭臺島渚目其處為

三堂劉兄出刺此州職修人治州中稱無事頗復增飾
從子弟而游其閒米芾硯史號石可為硯又有茯苓舊
唐書憲宗紀李師道與嵩山僧圓淨謀反呂元膺圍之
賊入嵩岳山棚盡擒之亦見通鑑漢循吏傳龔遂為渤海太守民有帶持刀劍者使賣劍買牛賣刀買犢又秋冬課收歛益畜果實菱芡郡中皆有畜積吏民皆富實數年上徵遂以年老拜為水衡都尉

道者院池上作

下馬逢佳客携壺傍小池清風亂荷葉細雨出魚兒井
好能冰齒茶甘不上眉歸途更蕭瑟真箇解催詩

杜子美水檻遣心詩細雨魚兒出微風燕子斜又詩歸路翻蕭颯陂塘五月秋又丈八溝納涼詩片雲頭上黑

應是雨
催詩

次韻子由送千之姪

江上松楠深復深，滿山風雨作龍吟。
年來老幹都生菌，下有孫枝欲出林。
白髮未成歸隱計，青山儻有濟時心。
閉門試草三千牘，仄席求人少似今。

柳子厚與蕭俛書：朽枿敗腐，猶足蒸出芝菌。嵇康琴賦：乃斲孫枝，準量所任。史記滑稽傳：東方朔初入長安，至公車上書，凡用三千牘。後漢章帝紀：建初五年，詔曰：朕思遲直士，仄席異聞。羊叔子讓開府表：側席求賢，不遺賤幽。

書文與可墨竹

并引

亡友文與可有四絕詩一楚辭二草書三畫四與
可嘗云世無知我者惟子瞻一見識吾妙處既沒
七年覩其遺跡而作是詩

筆與子皆逝詩今誰為新空遺運斤質卻弔斷絃人

次韻錢舍人病起

牀下龜寒且耐支杯中蛇去未應衰殿門明日逢王傅
樞具爭先看不疑坐覺香煙攜袖少獨愁花影上廊遲

何妨一笑千疴散絕勝倉公飲上池

龜支牀出史記龜策傳杯蛇出晉書樂廣傳並已見史
記曰者傳宋忠賈誼聞司馬季主言伏軾低頭卒不能
出氣居三日宋忠見賈誼於殿門外乃相引屏語相謂
自嘆云云誼為梁王傳漢雋不疑傳暴勝之為直指使
者不疑冠進賢冠帶櫪具劍上謁應劭曰櫪具木標首
之劍櫪落大壯也晉灼曰古長劍首以玉作轆轤形刻
木作山形如蓮花未數時今大劍木首其狀似此櫪音
磊莊子達生篇桓公田於澤見鬼焉公反諉詒為病齊
士有皇子告敖者曰公則自傷鬼惡能傷公云云桓公
輒然笑曰此寡人之所見也於是正衣冠與之坐不終
日而不知病之去也史記扁鵲傳少時遇長桑君出其
懷中藥予扁鵲曰飲是以上池之水三十日當知物矣
按倉公淳于意也飲上池乃扁鵲事公詩偶誤

次韻和王鞏

謫仙竄夜郎子美耕東屯造物豈不惜要令工語言王
郎年少日文如餅水翻爭鋒雖剽甚聞鼓或驚奔天欲
成就之使觸羝羊藩孤光照微陋耿如月在盆歸來千
首詩傾瀉五石樽卻疑彭澤在頗覺蘇州煩君看騶忌
子庶折配春溫知音必無人壞壁挂桐孫

唐李白傳賀知章曰子謫仙人也後以從永王璘辟長
流夜郎杜子美移居東屯詩淹留為稻畦又東屯稻畦
二百頃漢張良傳楚人剽疾願上慎毋與楚爭鋒周易
紙羊觸藩不能遂不能退無攸利史記騶忌子以鼓琴

見威王曰大絃濁以春溫者君也小絃廉折以清者相也再見李善注文選周禮注云孫枝竹枝之未生者桐孫亦然李賀詩嶧陽老樹非桐孫風俗通梧桐生於嶧陽山採東南孫枝為琴聲甚清雅

用王鞏韻送其姪震知蔡州

王震字子發文正公旦曾孫子發時

為給事中
故云夕郎

九門插天開萬馬先朝屯舉鞭紅塵中相見不得言
直走清虛宿扣門驚鵲翻君家汾陽家永巷車雷奔
夕郎方不夕列戟以自藩相逢開月閣畫簷低金盆
至今夢中語猶舉燈前尊阿戎修玉牒未憚筆削煩
君歸助獻

納坐繼岑與溫我客二子間不復尋諸孫

公自注子美詩云權門多

噂沓且復

尋諸孫

長安志郭汾陽宅在親仁里居其里四分之一中通永巷子孫甚衆杜牧阿房宮賦雷霆乍驚宮車過也漢故事黃門郎每日暮入對青瑣門拜故謂之夕郎即今之給事中也金盆用杜詩語屢見晉王戎傳阮籍謂王渾曰與卿語不如共阿戎談王注岑則岑文本與其兄子長倩溫則溫大雅與其弟彥博也文本為中書舍人侍郎令而兄子長倩為兵部侍郎同中書門下平章事大雅為黃門侍郎而彥博為中書舍人侍郎令

號國夫人夜游圖

佳人自鞚玉花驄翩如驚燕踏飛龍金鞭爭道寶釵落

何人先入明光宮
宮中羯鼓催花柳
玉奴絃索花奴手
坐中八姨真貴人
走馬來看不動塵
明眸皓齒誰復見
只有丹青餘淚痕
人間俯仰成今古
吳公臺下雷塘路
當時亦笑張麗華
不知門外韓擒虎

唐史正月望夜楊家五宅夜游與廣平公主爭西市門
楊氏怒鞭及公主衣公主墮馬羯鼓注再見玉奴已見
十九卷楊妃外傳妃善琵琶諸王貴主洎虢國已下並
為弟子每授曲畢皆廣有進獻汝陽王名璵小名花奴
尤善羯鼓帝嘗謂侍官曰白花奴將羯鼓來為我解穢
又八姨封虢國夫人不施粧自有美麗常素面朝天杜
子美詩虢國夫人承主恩
平明騎馬入宮門
卻嫌脂粉
澹顏色
淡掃蛾眉
朝至尊
又詩明眸皓齒
今何在
血汗

游魂歸不得地志揚州吳公臺以陳將吳明徹得名在江都縣西雷塘在縣東北十里煬帝初葬吳公臺下唐平江南改葬雷塘大業拾遺帝昏酒滋深嘗行吳公臺下恍惚與陳後主遇後主云每憶張麗華方憑臨春閣作璧月詞未終見韓擒虎躍領萬騎直來衝入便至今日始謂殿下政治在堯舜之上今日還此逸游曩時何見罪之深也帝叱之不復有所睹杜牧詩門外韓擒虎樓頭張麗華

用舊韻送魯元翰知洺州

我在東坡下躬耕三畝園君為尚書郎坐擁百吏繁鳴蛙與鼓吹等是俗物喧永謝十年舊老死三家村惟君綈袍信到我雀羅門緬懷故人意欲使薄夫敦新年到

宣室白首代堯言相逢問前輩所見多後一作昆道館

雖云樂冷卿當復溫還持刺史節卻駕朱輪軒黃髮方
用事白鬢宜少存嗣聖真生知拯民如救燔初囚羽淵
魄盡返湘江魂坐憂東郡決老守思王尊北流桑柘沒
故道塵埃翻知君一寸心可敵千步垣流亡自栖止老
幼忘崩犇得閑閉閣坐勿使道眼渾聊乘應捨筏直沂
無生源歸來成二老夜榻當重論

因話錄祠部謂之冰廳以其冷也王注世傳京師謂光祿為飽卿衛尉為煖卿鴻臚為睡卿司農為走卿宗正

為冷卿左傳堯殛鯀於羽山其神化為黃熊以入於羽
淵王注時哲宗初登極太母垂簾悉罷新法而元豐末
年用事宰執皆斥逐當時議新法不合被竄謫者皆召
還錄用金剛經如來常說汝等比丘知我說法如筏喻
者法尚應捨何況非法

次韻朱光庭初夏

朝罷人人識鄭崇直聲如在履聲中卧聞疎響梧桐雨
獨詠微涼殿閣風諫苑君方續承業醉鄉我欲訪無功
陶然一枕誰呼覺牛蟻初除病後聰

漢書鄭崇傳字子游哀帝擢為尚書僕射數諫爭上初
納用之每見曳革履上笑曰我識鄭尚書履聲南史李

承業集古今
章疏作諫苑

次韻朱光庭喜雨

久苦趙盾日欣逢傳說霖坐知千里足初覺兩河深破
屋常持傘無薪欲爨琴清詩似庭燎雖美未忘箴

左傳文七年趙衰冬日之日也趙盾夏日之日也書說
命若歲大旱用汝作霖雨詩小雅庭燎美宣王也因以
之箴

奉敕祭西太一和韓川韻四首

東軒筆錄太一宮舊在京城西

蘇村謂之西太一熙寧初詔作宮
於京城之東西隅謂之中太一

聖主新除秘祝侍臣來乞豐年壽宮神君欲至半夜靈

風肅然

漢文紀十三年詔曰蓋聞禍自怨起而福由德興今秘
祝之官移過於下以彰吾之不德朕甚不取其除之漢
郊祀志武帝置壽宮神君神君最貴者太一其佐曰大
禁司命之屬皆從之非可得見聞其言與人音等時
去時來來則風肅然也三輔黃圖壽宮北宮有神仙居
壽宮張羽旗設供具以禮神明若神明來則肅然風生
幃帳皆動

王璽親題御筆金章來侍天香禮罷祝融參乘前驅已

過衡湘

司馬相如大人賦祝融警
而蹕御兮清氣氤而後行

解劍獨行殘月披衣困卧清風夢蝶猶飛旅枕粥魚已
響枯桐

陂水初含曉綠稻花半作秋香皂蓋卻迎朝日紅雲正
繞宮牆

西太一見王荊公舊詩偶次其韻二首

王荊公詩云柳

葉鳴蜩綠暗荷花落日紅酣三十六陂春水
白頭相見江南二十年前此地父兄持我東
西今日重來白首欲尋舊迹都迷先生見此
兩絕注目久之曰此老野狐精也遂和之後

魯直亦

和四首

秋早川源淨麗雨餘風日清酣從此歸耕劍外何人送

我池南

杜詩草木變衰行劍外池南蓋歸蜀之路

但有樽中若下何須墓上征西聞道烏衣巷口而今煙

草萋迷

吳興記上若下若村並出美酒再見魏武紀注載公十二月已亥令云云後徵為都尉及遷為典軍校尉意遂更欲為國家討賊立功欲望封侯作征西將軍然後題墓道言漢故征西將軍曹侯之墓此其志也烏衣巷在

金陵荆公居金陵
是時已薨故云



施註蘇詩卷二十四

欽定四庫全書

集部

施註蘇詩卷二十五
六

詳校官庶吉士_臣李傳熊

檢討_臣何思鈞覆勘

覆校官中書_臣宋 鎔

校對官主事_臣龔敬身

謄錄舉人_臣龔秉震

欽定四庫全書

施註蘇詩卷二十五

宋 蘇軾 撰

施元之原註

武進邵長蘅刪補

詩四十九首

時在翰

林作

次韻子由送陳侗知陝州

誰能如鐵牛橫身負黃河滔天不能沒尺簣未易訶世
俗自無常徐公故逶迤別來不可說事與浮雲多當時
無限人毀譽即墨阿虛聲了無實夜蟲鳴機梭相逢一
笑外奈此白髮何天驥比蕭雲長鳴飽芻禾王庭旅百
實大貝隨弓戈君獨一麾去欲賡五袴歌甘棠古樂國
白酒金叵羅知君不久留治行中新科過客足瞋喜東
堂記分鵝此外但坐嘯後生工揣摩

徐公徐邈也三國盧欽言世人無常而徐公有常云云
詳見十九卷太守徐君猷詩注史記齊威王召即墨大

夫而語之曰自子之居即墨也毀言曰至然吾使人視
即墨田野闢人民給官無留事東方以寧是子不事吾
左右以求譽也封之萬家召阿大夫語曰自子之在阿
譽言日聞然吾使人視阿田野不闢民愁苦昔日趙攻
甄子弗能救衛取薛陵子弗知是子以幣厚吾左右以
求譽也是日烹之左傳莊二十二年庭實旅百天地之
美具焉書盾之舞衣大貝鼗鼓在西房允之戈和之弓
垂之竹矢在東房顏延年五君詠屢薦不入官一麾乃
出守五袴後漢廉范事注已見甘棠陝州事今驛名尚
謂之甘棠館晉劉毅傳初江州刺史庾悅隆安中為司
徒長史至京口毅時甚屯竄先就府借東堂與親故出
射而悅後與僚佐徑來詣堂毅告之曰毅屯否之人合
一射甚難君於諸堂並可望以今日見讓悅不許既而
悅食鵝毅求其餘悅又不答毅銜之義熙之政奪悅豫
章解其軍府使人微
示其旨悅恐懼而死

送賈訥倅眉二首

當年入蜀歎空回未見峨眉肯再來童子遙知頌襦袴

使君先已洗樽罍

公自注李大夫眉之賢守也

鹿頭北望應逢鴈人

日東郊尚有梅

公自注人日出東郊渡江游墓頤山眉之故事也

我老不堪歌

樂職後生試覓子淵才

杜子美鹿頭山詩鹿頭何亭亭樂職用王褒事褒字子淵注屢見

老翁山下玉淵回手植青松三萬栽父老得書知我在

蓬蒿親手為君開試看一一龍蛇舞更聽蕭蕭風雨哀

便與甘棠同不剪蒼髯白甲待歸來

公自注先君葬于墓頭山之東二十

餘里地名老翁泉君許為一往感歎之深故及之

送程建用

程建用字彞仲眉山山人

先生本古耕文字浩千頃空倉付公子坐待發苔穎十年困新說兒女爭捕影鑿垣種蒿蓬嘉穀誰復省空餘南陵意太息北堂冷織屨隨方進採薪教韋逞辛勤守一經救水賢五鼎今年聞起廢魯史復光景公子亦改官三就繁馬頸歸來一笑粲素髮颯垂領會看金花詔

湯沐奉朝請天公不吾欺壽與龜鶴永

郭憲洞冥記賈逵口授經傳致粟盈倉人謂之舌耕拾遺記亦云新說謂王安石三經新義漢鄧祀志谷永說上曰姦人挾左道以欺罔人主聽其言若將可遇求之盪盪如係風捕影終不可得莊子庾桑楚是其于辯也將妄鑿垣牆而植蒿蓬也毛詩南陔孝子相戒以養也詩國風焉得護草言樹之背注云背北堂也李太白贈楚司空詩北堂千萬壽奉侍有光輝晉翟方進傳母憐其幼隨之長安織屨以給再見晉列女傳韋逞母宋氏晝則採薪夜則教逞禮記啜菽飲水盡其歡斯之謂孝史記太史公自序春秋補敝起廢王道之大者魯史復光景謂元祐初詔復春秋周禮王路錫樊纓十有再就鄭司農云喪禮下篇曰馬纓三就禮家說曰纓當胸以削革為之三就三重三匝杜預左傳注繁纓馬飾也潘安仁秋興賦素髮

颯以垂領家敏求春明退朝錄官告之制夫人金花
羅紙七張公羊傳湯沐之邑漢齊悼惠王傳以一郡
上太后為公主湯沐邑顏師古注高紀曰以其稅賦
供湯沐之具晉職官志奉朝請本不為官無員漢東
京罷三公外戚宗室諸侯多奉朝請奉朝請者奉朝
會請召而已白樂天雨中花詩松枝上鶴著下龜千
年不死
仍無病

次韻李修孺留別二首

十年流落敢言歸
魚鳥江湖只自知
豈意青天掃雲霧
盡呼黃髮寄安危
風流吾子真前輩
人物他年記一時
我欲折繻留此老
緇衣誰作好賢詩

晉樂廣傳衛瓘見廣而奇之曰此人之水鏡見之瑩然
若披雲霧而睹青天尚書尚猶詢咨黃髮則罔所愆唐
郭子儀傳以身為天下安危者二十
年禮記好賢如緇衣惡惡如巷伯

此生別袖幾回麾夢裏黃州空自疑何處青山不堪老
當年明月巧相隨窮通等是思家意衰病難堪送客悲
好去江魚煮江水劍南歸路有姜詩

後漢列女傳廣漢姜詩事母至孝母好飲江水嗜魚鱠
夫婦力作供鱠舍側忽有泉湧味如江水每旦輒出雙
鯉以供膳

次韻黃魯直赤目

誦詩得非子夏學紬史正作邱明書天公戲人亦薄相
略遣幻翳生明珠賴君年來屏鮮腴百年燈光同一如
書成自寫蠅頭表端就君王覓鏡湖

史記子夏子死哭之失明漢司馬遷傳為太史令紬史
記石室金匱之書又報任安書云左邱失明厥有國語

和周正孺墜馬傷手

周正孺名尹成都人

平生學道已神完豈復兒童私自憐醉墜何曾傷內守
色憂當為念先傳書空漸覺新詩健把蟹行看樂事全
賣卻老驄為酒直大呼鄉友作新年

莊子達生篇醉者之墜車雖疾不死其神全也再見禮記卅子色憂不滿容又樂正子春下堂而傷足數月不出猶有憂色曰父母全而生之子全而歸之可謂孝矣今予忘孝道是以有憂色書室殷浩事把蟹使畢卓持螯事注並再見

戲周正孺二絕

折臂三公未可知會當千鎰訪權奇
勸君驚駭猶閑事腸斷閨中楊柳枝

晉羊祜傳善相墓者言祜祖墓有帝王氣祜鑿之相者曰猶出折臂三公祜竟墜馬折臂位至公太公六韜商王拘周伯昌于羑里太公以金千鎰求天下珍物以免君之罪于是得大戎氏文馬名雞斯之乘以獻商王漢

禮樂志天馬歌志倣儻精權奇駱馬揚枝
用白樂天事互見十二卷及二十卷詩注

天廐新攷玉鼻驛故人共敝亦常情相如雖老猶能賦

換馬還應繼二生

換馬用愛妾換馬事詳見二十一
卷張近幾仲龍尾子石硯詩注

題文與可墨竹并引

故人文與可為道師王執中作墨竹且謂執中勿
使他人書字待蘇子瞻來令作詩其側與可既沒
八年而軾始還朝見之乃賦一首

斯人定何人游戲得自在詩鳴草聖餘兼入竹三昧時
時出木石荒怪軼象外舉世知珍之賞會獨余最知音
古難合奄忽不少待誰云生死隔相見如龔隗

楚詞遠游吾將從王喬而游戲法書苑懷素自言得草
書三昧法華經佛入于無量義處三昧疏云梵語三昧
此云正受晉藝術隗照傳照善易臨終版授其妻曰吾
亡後五年有詔使來姓龔此人負吾金即以此版責之
期日果有龔使者止亭中妻遂齋版往責之使者惘然
不知所以良久乃命取著筮之卦成嘆曰妙哉隗生于
是告照妻曰吾不負金賢夫自有金知吾善易故書版
以寄意耳金有五百斤盛以青甕覆以銅拌埋在堂屋
東頭還掘之皆如卜

潘推官母李氏挽辭

南浦淒涼老逐臣東坡還往盡幽人杯棹一作盤慣作陶

家客絃誦嘗叨孟母隣尚有升堂他日約豈知負土一

阡新今年我欲江湖去暮雨連山宰樹春

楚詞九歌送美人兮南浦江文通別賦送君南浦傷如
之何列女傳孟軻之母號孟母三徙乃舍學宮之旁戲
嬉設俎豆揖讓進退孟母曰此真可以居矣君子謂孟
母善以漸化陶家用侃母事升堂用范張事並再見

玉堂栽花周正孺有詩次韻

故山桃李半荒榛麤報君恩便乞身竹簟暑風招我老

玉堂花藥為誰春
纖纖翠蔓詩催發
皎皎霜葩髮鬪新
只有來禽青李帖
他年留與學書人

歐陽公內制集序涼竹簾之暑風曝茅簷
之冬日晉王逸少有來禽青李帖再見

杜介送魚

新年已賜黃封酒
舊老仍分鱸尾魚
陋巷關門負朝日
小園除雪得春蔬
病妻起斫銀絲鱠
稚子謹尋尺素書
醉眼朦朧覓歸路
松江煙雨晚踈踈

送杜介歸揚州

再入都門萬事空開看清洛漾東風當年帷幄幾人在
回首觚稜一夢中採藥會須逢蒟子問禪何處識龐翁
歸來鄰里應迎笑新長淮南舊桂叢

班孟堅西都賦設壁門之鳳闕上觚稜而棲金爵注觚稜闕角也後漢蒟子訓傳有百歲翁自說為兒時見子訓賣藥于會稽市顏色不異今日傳燈錄江湖縉白謂禪門龐居士即毗耶淨名楚詞招隱士淮南小山之作也其辭云挂樹叢生兮山之幽偃蹇連卷兮枝相繚

狄詠石屏

狄詠樞密使武襄公青之子與先生同館伴遼使

霏霏點輕素眇眇開重陰風花亂紫翠雪外有煙林雪

近勢方壯林遠意殊深會有無事人支願識此心

和黃魯直燒香二首

四句燒香偈子隨香遍滿東南不是聞思所及且令鼻

觀先參

華嚴經觀世音菩薩聞思修入三摩地楞嚴經孫陀羅
難陀白佛言世尊教我及拘絺羅觀鼻端白我初諦觀
經三七日見鼻中氣出入
如煙煙相漸消鼻息成白

萬卷明窻小字眼花只有爛斑一炷煙消火冷半生身

老心閑

再和

公自注來詩言飲酒畫竹石草書

置酒未逢休沐便同越北燕南且復歌呼相和隔牆知是曹參

丹青已自前世竹石時窺一斑五字還當靖節數行誰似高閑

王維詩當代謬詞客前身應畫師韓退之高閑上人序今閑之于草書有旭之心哉

武昌西山

并引 簾聽以字行 鄧潤甫字溫伯建昌人宣仁

名哲宗親政溫伯首開紹述遂基宗社之禍拜尚書左丞居位財兩月薨

嘉祐中翰林學士承旨鄧公聖求為武昌令常游
寒溪西山中人至今能言之軾謫居黃岡與武
昌相望亦常往來谿山間元祐元年十一月二十
九日考試館職與聖求會宿玉堂偶話舊事聖求
嘗作元次山窪樽銘刻之巖石因為此詩請聖求
同賦當以遺邑人使刻之銘側

春江淥漲蒲萄醅武昌官柳知誰栽憶從樊口載春酒
步上西山尋野梅西山一上十五里風駕兩腋飛崔嵬

同游困卧九曲嶺褰衣獨到吳王臺中原北望在何許
但見落日低黃埃歸來解劍亭前路蒼崖半入雲濤堆
浪翁醉處今尚在石臼杯

一作杯音
薄侯切

飲無樽罍爾來古

意誰復嗣公有妙語留山隈至今好事除草棘常恐野
火燒蒼苔當時相望不可見玉堂正對金鑾開豈知白
首同夜直卧看掾燭高花摧江邊曉夢忽驚斷銅鑲玉
鎖鳴春雷山人帳空猿鶴怨江湖水生鴻鴈來請公作
詩寄父老往和萬壑松風哀

晉陶侃傳鎮武昌課諸營種柳都尉夏施盜官柳植之于門侃後見駐車問曰此是武昌西門柳何因盜來此種施惶怖謝罪解劍亭在武昌先生嘗云子胥渡江處也唐元結傳字次山後家瀛濱乃自稱浪士元次山集有宥搏銘云片石何壯如獸之跋其背頤宥可以為鐫又杯鐫銘云誰能杯飲共守淳朴唐史宣宗以金蓮燭送令狐綯歸翰林院蓋椽燭而以金蓮花承之杜子美詩鴻鴈幾時到江湖秋水多

再用前韻

朱顏發過如春醅胸中梨棗初未栽丹砂未易掃白髮赤松卻欲參黃梅寒溪本自遠公社白蓮翠竹依崔嵬當時石泉照金像神光夜發如五臺飲泉鑒面得真意

坐視萬物皆浮埃欲收暮景返田里遠泝江水窮離堆
還朝豈獨羞老病自歎才盡傾空壘諸公渠渠若夏屋
吞吐風月清隅隈我如廢井久不食古甕缺落生陰苔
數詩往復相感發汲新除舊寒光開遙知二月春江濶
雪浪倒卷雲峰摧石中無聲水亦靜云何解轉空山雷

公自注韋應物詩云水性本云靜石中固無聲如何兩相激雷轉空山驚欲就諸公評此語

要識憂喜何從來願求南宗一勺水往與屈賈湔餘哀

真誥火棗交梨之樹已生君心中再見漢張良傳注赤松子仙人號也再見傳燈錄弘忍大師者蘄州黃梅人

廬山記遠公與十八賢同修淨土號白蓮社陳舜俞廬
山記晉陶侃為廣州刺史海濱漁人常見夜有光艷網
之得金文殊菩薩像後商人于東海亦獲圓光持以就
像若彌縫焉侃以送武昌寒溪寺侃移督江州迎以自
隨復為風濤所溺遠公般若寺乃禱于水上其像復出會
昌毀寺二僧藏之錦繡谷其後寺復訪之不獲至今岑
頂佛手巖天池有見光相者東海文殊傳五臺即五方
如來之座也華嚴經疏清凉山者鴈門郡五臺山也劉
禹錫送僧詩釋子道成神氣閑住持曾上清凉山晴空
禮拜見真像金毛五髻卿雲間漢溝洫志蜀守李冰鑿
離堆避沫水之害穿二江成都中南史江淹傳爾後為
詩絕無美句時人謂之才盡毛詩於我乎夏屋渠渠周
易井渫不食舊井無禽孟浩然詩一日不讀書心荒如
廢井傳燈錄僧問雲門如何是曹溪一滴水按禪宗自
中華五祖之下曹溪六祖為南宗神秀大師為北宗史
記屈原傳自原沉汨羅後百有餘年矣漢有賈誼為長

沙太傅過湘水
授書以帛之

送楊孟容

墨跡刻石成都府治題
云送楊體先知廣安軍

我家峨眉陰與子同一邦相望六十里共飲玻璃江
江山不違人遍滿千家牕但苦牕中人寸心不自降子歸
治小國洪鐘噓微撞我留侍玉座弱步歌豐扛後生多
高才名與黃童雙不肖入州府故人餘老龐殷勤與問
訊愛惜霜眉龐何以待我歸寒醅發春缸

漢項籍傳力扛鼎顏師古曰扛舉也說文兩人對
舉曰扛杜子美遣興詩昔者龐德公未曾入州府

見子由與孔常父唱和詩輒次其韻余昔在館
中同舍出入輒相聚飲酒賦詩近歲不復講故
終篇及之庶幾諸公稍復其舊亦太平盛事也

君先魯東家門戶照千古文章固應爾須鬣餘似處雖
非蒙俱狀尚肖歷國苦誦書口瀾翻布穀雜杜宇十年
困奔走櫛沐飽風雨吾道其非邪野處豈兕虎霸陵閑
老将柏直口尚乳自君兄弟還鼎立知有補蓬山耆舊
散故事誰刪去來迎馮翊傳出餞會稽組吾猶及前輩

詩酒盛冊府願君倡此風揚解斯杜舉

孔子家語魯人不識孔子聖人乃曰彼東家丘吾知之矣荀子非相篇仲尼之狀面如蒙俱後漢馮衍傳詞如循環口如布穀莊子天下篇禹堙洪水沐甚雨櫛疾風史記孔子世家楚使人聘孔子陳蔡大夫發徒役圍孔子于野不得行孔子召子路而問曰詩云匪兕匪虎率彼曠野吾道非邪吾何為于此霸陵用李廣事屢見漢高祖紀漢王問酈食其魏大將誰也曰柏直王曰是口尚乳臭不能當韓信後漢竇章傳學者稱東觀為老氏藏室道家蓬萊山漢朱買臣傳買臣衣故衣懷其印綬步歸郡邸有頃長安廐吏乘駟馬車來迎買臣遂乘傳去穆天子傳羣玉之山先王所謂冊府注云先王以為藏書冊之府禮記至于今既畢獻斯揚解謂之杜舉

趙令晏崔白大圖幅徑三丈

濠圖經見聞志崔白梁人工畫花竹

銚毛熙寧初命與艾宣畫垂拱殿御宸竹鶴各一扇白為首出

扶桑大壘如壘盎天女織綃雲漢上往來不遣鳳銜梭
誰能鼓臂投三丈人間刀尺不敢裁丹青付與濠梁崔
風蒲半折寒鴈起竹閒的皪寒江梅畫堂粉壁翻雲幙
十里江天無處著好卧元龍百尺樓笑看江水拍天流

女仙傳園客妻神女也園客種五色香草積數十年服食其實忽有五色蛾集香草上客收而薦之以布生花蠶焉至蠶時有女自來助客養蠶亦以香草飼之得壘百十二枚大如壘列仙傳述異記並云互見一卷和子由踏青詩注博物志有居海島上者每年八月見浮槎過因齋糧而登忽至一處城郭甚壯舍中多織婦俄一

丈夫牽牛水次飲之後乃知天河也西京雜記成
帝設雲帳雲幄雲幕于甘泉紫殿世謂之三雲殿

次韻張昌言給事省宿

張昌言名問兩為河北轉運知滄州新法之行

獨不阿時好元祐初為祕書監使河北相度
水事過永靜軍奏乞減價糶本軍寄糶斛斗
四十餘萬石救郡民饑朝廷從之還為給事
中故有朔野按行猶雀躍之句未幾致仕而
卒年七十五按昌言本襄陽人种世衡遺以
汝州田十頃辭弗受當是從居于汝先生亦
常欲居汝故云待向松陽求水竹一犂煙雨
伴公歸雖南遷此志不遂諸子以治命卒葬
汝之郊城焉

馮顛久已歌殘雪戎眼何曾眩落暉朔野按行猶爵躍

東臺暝坐覺鳥飛

公自注道家有鳥飛入兔宮之說

謾誇年少容吾在

公自注樂天詩云猶有詩張少年處笑呼張文喚殷兄

若鬪樽前舉世稀待向松

陽求水竹一犁煙雨伴公歸

馮顥言馮唐也唐白首郎署故云晉王戎傳戎視日不眩裴楷見而目之曰戎眼爛爛如巖下電莊子在宥篇鴻蒙方將拊髀雀躍而遊牛僧孺贈劉中丞詩休論世上升沉事且鬪樽前見在身再見

次韻三舍人省上

公自注三月二十九日作明日駕幸景靈宮

紛紛榮瘁何能久雲雨從來翻覆手恍如一夢墮枕中

卻見三賢起江右

公自注曾子開劉貢父孔經父皆江西人

嗟君妙質皆瑚

璉顧我虛名但箕斗明朝冠蓋蔚相望共扈翠輦朝宣
光武皇已老白雲鄉正與羣帝駢龍翔獨留杞梓扶明堂
杜子美貧交行翻手作雲覆手雨紛紛輕薄何須數古
詩南箕北有斗牽女不負軫良無磐石固虛名復何益
本朝事實景靈宮神宗御容殿曰宣光杜詩矯如羣帝
駢龍翔韓退之送張道士詩況當營都邑杞梓用不疑

送錢承制赴廣西路分都監

當年我作表忠碑坐覺江山氣未衰舞鳳尚從天目下
收駒時有渥洼姿踞牀到處堪吹笛橫槊何人解賦詩
知是丹霞燒佛手先聲應已懾羣夷
公自注廣西僧寺
頃有佛動之異錢

君碎而投
之江中

表忠觀碑詳見十七卷送錢道士歸杭注杭州國經吳
越王錢氏世墓臨安先是有題詩于上者云天目山前
兩乳旁鸞飛鳳舞下錢塘兩山空缺橫為案數百年中
出五王或云乃晉郭璞詩其後二句云海門山氣橫為
按五百年間異姓王今兩存之又天目山上有兩湖如
左右目故名晉桓伊傳伊有蔡邕柯亭管常自吹之王
徽之赴召命泊舟青溪素不相識伊于岸上過徽之令
人謂曰聞君善吹笛為我一弄伊時已顯貴素聞徽之
名便下車踞胡林為作三調弄畢便上車去客主不交
一言新唐書杜甫傳元稹論曰建安之後曹氏父子鞍
馬間為文往往橫槊賦詩故其狀抑揚怨哀悲離之作
尤極于古傳燈錄丹霞禪師于慧林寺遇天寒取木佛
之焚

次韻曾子開從駕二首

曾子開名肇子固幼弟舉進士入館閣編修國

史自熙寧以來四十年大臣更用事邪正相軋黨論屢起子開身更其間數不合兄布與韓儀公忠彥並相祐陵初政日謀所以傾危之子開詒書警戒甚切其兄不能用蔡京得政兄弟俱不免

槐街綠暗雨初勻
瑞霧香風滿後塵
清廟幸同觀濟濟
豐年喜復接陳陳
雍容已饜天庖賜
俯伏初嘗貢茗新
輦路歸來聞好語
共驚堯顙類高辛

史記五帝本紀帝嘗高辛崩故顙立是為帝堯孔子世家鄭人或謂子貢曰其顙似堯

入仗魂驚愧草萊一聲清蹕九門開
暉暉日傍金輿轉
習習風從玉宇來
流落生還真一芥
周章危立近三槐

公自注學士班近執政

道傍儻有山中舊問我收身蚤晚回

周禮官正凡邦之事蹕鄭氏云蹕止行者楚辭九歌聊翱游兮周章周禮三槐三公位焉歐陽述懷詩何日蚤收身江湖一漁艇

再和

眼花錯莫鬢霜勻
病馬羸騶只自塵
奉引拾遺叨侍從
思歸少傅羨朱陳
衰年壯觀空驚目
嶮韻清詩苦鬪新

最後數篇君莫厭擣殘椒桂有餘辛

毛詩無將大車祇自塵兮杜子美憶昔詩我昔近侍叨奉引子美以至德二年拜右拾遺白樂天有朱陳村詩樂天以開成初改太子少傅

憶觀滄海過東萊日照三山迤邐開桂觀飛樓凌霧起
仙幢寶蓋拂天來不聞宮漏催晨箭但覺簷陰轉古槐
供奉清班非老處會稽何日乞方回

公自注時方闕會稽守

揚子觀書者譬諸觀山及水升東嶽而知衆山之迤邐也白樂天詩朱箔銀鉶迤邐開史記封禪書公孫卿言仙人好樓居于是上令長安作蜚廉柱觀吳越春秋范蠡為句踐立飛翼樓以象天門維摩經起七寶塔以一

切纓絡幢幡而供養之又毗耶離城長者子持七寶蓋來詣佛所杜子美詩翠華拂天來向東周禮挈壺氏縣壺以序聚椽鄭氏云縣壺以為漏漏之箭晝夜共百刻冬夏之間有長短焉太史立成法有四十八箭杜和賈舍人詩五夜漏聲催曉箭又詩憶昨逍遙供奉班去年今日侍龍顏晉郝愔傳字方回除太常固讓不拜樂補遠郡從之出為會稽內史久之乞骸骨曰居會稽

次韻貢父省上

密雲今日破郊西疎雨脩脩未作泥要及清閑同笑語
行看衰病費扶携花前白酒傾雲液戶外青驄響月題
不用臨風苦揮淚君家自與竹林齊公自注貢父詩中
有不及與其兄原

甫同時之歎然其兄子
仲馮今為起居舍人

周易密雲不雨自我西郊韓退之南內朝賀歸詩薄雲
蔽秋曦清雨不成泥莊子馬蹏篇伯樂善治馬加之以
衡扼齊之
以月題

再和

當年曹守我膠西共厭舖糟與汨泥自古赤丸成習俗
因公黃犢免提携生還各有青山興病起猶能小字題
莫怪歌呼數相和曾將獄市寄全齊

公自注貢父為曹州盜賊皆奔隣境

有詩云從教
晉盜稍奔秦

漢地理志高密國文帝十六年為膠西宣帝本始元年
更高密曹守言劉貢父也楚辭漁父世人皆濁何不汨
其泥而揚其波衆人皆醉何不餉其糟而飲其醕赤丸
用尹賞事黃犢用龔遂事並已見漢曹參傳為齊丞相
召去屬其後相曰以齊
獄市為寄慎勿擾也

次顧子敦奉使河朔

顧子敦名臨會稽人舉說
書科入館閣元祐二年擢

給事中朝廷開回河拜待制出為河北都轉
運使公疏言臨資性方正學有根本慷慨中
立凜然有古人之風宜留寘左右別選深知
河事者往使不報後諸公餞于敦復次前韻
詩有云上書苦留君言拙輒報已指此事也
子敦至部請因河勢回使東流復召歸班為
翰林學士紹聖初以龍圖閣學士守定徙應
天河南時論既變奪職守新安斥居番陽年

七十二卒徽
宗立追復之

我友顧子敦軀膽兩俊偉便便十圍腹不但貯書史容
君數百人一笑萬事已十年臥江海了不見愠喜磨刀
向豬羊醺酒會鄰里歸來如一夢豐頰愈茂美平生批
敕手濃墨寫黃紙會當勒燕然廊廟登劍履翻然向河
朔坐念東郡水河來屹不去如尊乃勇耳

唐李藩傳為給事中制有不便就敕尾批卻之吏請聯
他紙藩曰聯紙是牒豈曰批敕耶後漢竇憲傳擊匈奴
登燕然山刻石勒功紀漢威德班固作銘漢蕭何傳高
帝賜何帶劍上殿晉王導傳劍履上殿入朝不趨漢王

尊傳為東平相謂東平王天下皆言王勇顧但負貴安
能勇如尊乃勇耳又尊為東郡太守河溢瓠子金堤尊
居堤上不去詳見十三卷河復詩注王立之詩話元祐
中顧子敦有顧屠之號以其極肥偉也其後奉使河朔
居士有詩送之云便便十圍腹不但貯書史又云磨刀
向豬羊醺酒會鄰里又云批殺手皆用屠家語也子敦
讀之頗不樂所以居士復和前
篇云善保千金軀前言戲之耳

次韻子由送家退翁知懷安軍

家退翁名定國弟復禮名安國

東坡子由及退翁兄弟少時皆嘗從
眉州劉微之見子由送家安國詩

吾州同年友槃若琴上星當時功名意豈止拾紫青事

既喜

喜字疑誤
當作與

違願天或不假齡今如圖中鶴俛仰在

一庭

公自注吾州同年友十三人今存者六人而已故有琴上星圖中鶴之語退翁守清約

霜菊有餘馨鼓笛方入破朱絃微莫聽西南正春旱廢
沼黏枯萍翩然一麾去想見靈雨零我無謫仙句待詔
沉香亭空騎內廐馬天仗隨雲駢竟無絲毫補眷焉誰
汝令永愧舊山叟憑君寄丁寧

劉禹錫送張盟詩序今人以偕升名為同年友漢夏侯
勝傳經術荀明取青藜如拾地芥耳晉嵇康傳作幽憤
詩曰事與願違遺茲淹留毛詩靈雨既零命彼倌人後漢
郎顗傳丁寧再三

諸公餞子敦軾以病不往復次前韻

君為江南英面作河朔偉人閒一好漢誰似張長史上
書苦留君言拙輒報已置之勿復道出處俱可喜攀輿
共六尺食肉飛萬里誰言遠近殊等是朝廷美遙知送
別處醉墨爭淋紙我以病杜門商頌空振履後會知何
日一歡如覆水善保千金軀前言戲之耳

舊唐書狄仁傑傳武后問曰朕要一好漢任使有乎仁
傑曰荊州長史張柬之其人雖老宰相材也若用之必
能盡節于國家漢東方朔傳四方士上書言得失其不
足采者輒報聞罷先生奏議有乞留顧臨狀漢索盜傳
天子所與共六尺輿者皆天下豪英後漢班超傳相者
謂超曰生燕頤虎頸飛而食肉萬里侯相也莊子讓王

篇曾子居衛曳綖而歌商頌聲滿天地若出金石新序
原憲曳杖拖履行歌商頌天子不得而臣諸侯不得而
友也

和張昌言喜雨

二聖憂勤忘寢食百神奔走會風雲禁林夜直鳴江瀨
清洛朝回起縠紋夢覺酒醒聞好語帳空簾冷發餘薰
秋來定有豐年喜剩作新詩準備君

二聖謂指宗與太后也劉禹錫竹枝詞瀼西
春水縠紋生杜牧之詩水紋如縠燕差池

次韻劉貢父西省種竹

要知西掖承平事記取劉郎種竹初舊德終呼名字外

後生誰續笑談餘

公自注昔李公擇種竹館中戲語同舍後人指此竹必云李文正手植貢

父笑曰文正不獨繫筆亦知成陰障日行當見取笋供

種竹耶時有筆工李文正

庖計已疎白首林間望天上平安時報故人書

酉陽雜俎李衛公言北都惟童子寺有竹一窠才長數尺公令其寺綱維每日報竹平安公自注亦云

偶與客飲孔常父見訪設席延請忽上馬馳去
已而有詩戲用其韻答之

揚雄他文不皆奇獨稱觀鉅居井眉酒客法士兩小兒

陳遵張竦何曾知主人有酒君獨辭蟹螯何不左手持
豈復見吾橫氣機遣人追君君絕馳盡力去花君自癡
醅醕與酒同一卮請君更問文殊師

魏文帝典論如王粲之初征登樓捫賦征思徐幹之立
猿漏卮員扇橘賦雖張蔡不過也然于他文未能稱是
漢陳遵傳遵與張竦俱以列侯歸長安竦居貧無賓客
時時好事者從之論道經書而遵晝夜號呼車騎滿門
先是揚雄作酒箴為酒客難法度士譬之于物曰子猶
餅矣觀餅之居居井之眉自用如此不如鴟夷遵大喜
之謂竦曰吾與爾猶是莊子應帝王篇季咸相壺于壺
子曰吾向示之以太沖莫勝是殆見吾橫氣機也明日
又與之見壺子立未定自失而走壺子曰追之列子追
之不及返以報壺子曰已滅矣已失矣吾弗及矣維摩

經花至大弟子便著不墮一切弟子神力去花不能令去又互見前

次韻子由書李伯時所藏韓幹馬

李伯時名公麟一字叔時

舒城人南唐先主昇諸孫舉進士長于詩父虛一喜藏法書名畫伯時自少好之遂悟古人用筆畫特精絕氣韻高遠意造天成顧陸張吳殆不能過留意三代鼎彝之器博學精鑒用意至到聞一罷雖千金不少靳性嗜玉見輒以善價求之晚作洗玉池先生銘之又酷愛伯時丹青見于詩篇文字不一而足其仕監奏邸敕令刪定官御史檢法官後病痺不能運筆反以厚貲收已所作云

潭潭古屋雲幙垂省中文書如亂絲忽見伯時畫天馬

朔風胡沙生落錐天馬西來從西極勢與落日爭分馳
龍膺豹股頭八尺奮迅不受人間羈元狩虎脊聊可友
開元玉花何足奇伯時有道真吏隱飲啄不羨山梁雌
丹青弄筆聊爾耳意在萬里誰知之幹惟畫肉不畫骨
而況失實空餘皮煩君巧說腹中事妙語欲遣黃泉知
君不見韓生自言無所學廐馬萬匹皆吾師

歸藏啟筮云昔者女媧坐張雲幕史記樂書武帝伐大宛得千里馬作歌曰天馬來兮從西極經萬里兮歸有德漢禮樂志元狩三年馬生渥洼水中作天馬歌曰天馬來出泉水虎脊兩化若鬼杜子美丹青引先帝天馬

玉花驄畫工如山貌不同又幹惟畫肉不畫骨忍使驂
驪氣凋喪唐文粹范傳正李翰林新墓碑云驂驪筋力
成意在萬里外後漢禰衡傳衡為作書記輕重疎密各
得體宜黃祖持其手曰處士此正得祖意如祖腹中之
所欲也名畫記上令韓幹師陳閔怪其不
同幹曰臣自有師陛下內廐馬皆臣師也

次韻劉貢父獨宿省中

明牕畏日曉先暾高柳鳴蜩午更喧筆老新詩疑有物
心空客疾本無根隔牆我亦眠風榻上馬君先瑣月軒
共喜蚤歸三伏近解衣槃礴亦君恩

軾以去歲春夏侍立邇英而秋冬之交子由相

繼入侍次韻絕句四首各述所懷

瞳瞳日脚曉猶清細細槐花暖自

一作欲

零坐閱諸公半

廊廟

公自注僕射呂公門下韓公右丞劉公皆自講席大用

時看黃色起天庭

上尊初破蚤朝寒茗盃仍霑講舌乾陞楯諸郎空雨立
故應慙悔不儒冠

陞楯儒冠

注並已見

兩鶴摧頽病不言年來相繼亦乘軒悞聞九奏聊飛舞
可得裴回為啄吞

左傳閔二年衛懿公好鶴鶴有乘軒者史記扁鵲傳百
神游于鈞天廣樂九奏萬舞又樂書師曠鼓琴一奏有
玄鶴二八集乎廊門再奏之延頸而鳴舒翼而舞藝文
類聚白鶴古詩云五里一反顧六里一裴回吾欲銜汝
去口噤不能開吾欲負汝去毛羽日摧頽漢東方朔傳
尻益高者鶴俛啄也文選升天行啄腐吞腥

微生偶脫風波地晚歲猶存鐵石心定似香山老居士

世緣終淺道根深

公自注樂天自江州司馬除忠州刺史旋以主客郎中知制誥遂拜中書

舍人載雖不敢自比然謫居黃州起知文登召為儀曹
遂忝侍從出處老少大畧相似庶幾復享此翁晚節閑
適之樂焉

送宋朝散知彭州迎侍二親

宋彭州名構字
成之成都人

東來誰迎使君車知是丈人屋上烏丈人今年二毛初
登樓上馬不用扶使君負弩為前驅蜀人不復談相如
老幼化服一事無有鞭不施安用蒲春波如天漲平湖
鞞紅照坐香生膚褰韞上壽白玉壺公堂登歌鳳將雛
諸孫歡笑爭挽須蜀人畫作西湖圖

說苑太公謂武王曰愛其人者兼屋上之烏杜子美贈
李四丈詩丈人屋上烏人好烏亦好左傳僖二十二年
君子不禽二毛注頭白有二色也潘安仁秋興賦春秋
三十有二始見二毛漢司馬相如傳使西南夷至蜀太
守以下郊迎縣令負弩矢先驅蜀人以為寵後漢劉寬
傳典歷三郡溫仁多恕吏人有過但用蒲鞭罰之示辱

而已北史崔祖思叔父景真為平昌太守有惠政常懸一蒲鞭而未嘗用去任之日士人思之為立祠韞紅牡丹名見歐陽花譜彭州多此花唐韻韞韞也音與眷同史記淳于髡傳親有嚴客髡拳鞫曉侍酒于前時賜餘滌奉觴上壽再見晉樂志鳳將雛舊曲也杜北征詩問事競挽須誰能即嗔喝

郭熙畫秋山平遠

公自注文潞公為跋尾圖畫見聞志郭熙河陽人工畫山

水寒林

玉堂畫掩春日閑中有郭熙畫春山鳴鳩乳燕初睡起白波青嶂非人閒離離短幅開平遠漠漠疎林寄秋晚恰是江南送客時中流回頭望雲巘伊川佚老鬢如霜

卧看秋山思洛陽為君紙尾作行草炯如嵩洛浮秋光
我從公游如一日不覺青山暎黃髮為畫龍門八節灘
待向伊川買泉石

杜子美詩鳴鳩乳燕青春深又詩白波吹粉壁青嶂插
彫梁伊川佚老文潞公也白樂天開八節灘詩序云東
都龍門潭之南有八節灘九峭石
唐田游巖傳泉石膏盲煙霞痼疾

次韻張昌言喜雨

千里黃流失故居年來赤地到青徐遙聞爭誦十行詔
無異親巡六尺輿精貫天人一言足雲興嶽瀆萬靈趨

愛君誰似元和老賀雨詩成即諫書

後漢循吏傳光武以手跡賜方國者皆一札十行細書
成文白樂天元和三年賀雨詩卒章云君以明為聖臣
以直為忠敢賀有其始亦願有其終
漢王吉傳以三百篇諫故無諫書

施註蘇詩卷二十五